


CIMONYAMONYA

 Tùshaalàayi biimànyine kuulu bwà katanci kakesè cyanààna. Mukalenge wa mushinga mukolè, tudi tulwa ku bwikadi Bwèbè bwà Bunzambi cyàkàbìdì mu disambila; dyàmbedi, bwà kwela twasàkidila bwà byònsò byúdi Wèwè mutwènzèle, ne bwà dinanga dinène didì mu mwoyi wètù bwèbè Wèwè ne Díyi Dyèbè. Mukalenge, bantu aba, dilòòlò edi, bândi munangè ne mwoyi wànyi wònsò, mbaditácishe ne balwè bwà kusòmba mu cibambalu cyà luuyà emu, ne bikwàbò, bwalu mbanangè Díyi Dyèbè.

² Nènku tudi tulwa bwà kusambidila babèèdi, dilòòlò edi, Mukalenge, ne bàdi mu lukèngelu. Kakwikadikù muntu kampànda mutekète munkaci mwètù ku ndekeelu kwà disangisha edi to. Báfutàaku bwà lulamatu lwàbò, Mukalenge. Akwilà neetù ku Díyi Dyèbè, ne ùtùkankàmikè, Mukalenge, patùdi twenda tuya apa, bambule kadiwù. Ndyèsè kaayi dyà kwenza cyòci eci! Tudi tulòmba mu Dìna dyà Yesù. Amen. Sòmbaayi.

³ Ncivwa mwà kupeta myàkù, mu bushùwà bwà bwalu, bwà kumvwija dyanyisha dyànyì kùdi musùmbà wà bantu bu aba nùnkù to, bàdi mwà kulwa ne kusòmba mu nzùbu ewu. Ndi muswè kwamba, ne, mààlaba . . . Anyi, netùye ku Topeka kwàka, mu Kansas, bwà disangisha dyàlonda, ne dyòdi adi nedijike dyàlumingu dyàlonda. Nènku díbà adi tudi tuya, tuumukila kwòkò aku, batàngile ku Philadelphia.

Nènku, mpindyewu, tudi ne cyà kuya dyàmwàmwa dyà mbú, ku Kenya, ne ku Tanganyika, ne ku Uganda, mu bi—bifuku bìdi kuntwaku. Nènku bàdi munkaci mwà kutombokelangana mpindyewu kùdi ba Mau Maus. Ncyènà mwà kubwelamu bu mpàndànjlà to, kàdi nenteetè bwà kubwelamù bu cilembi. Kubwelamù, ne bàdi munkaci mwà kudìlongolola.

⁴ Pa ciibidilu, nsòmbèla ngâyàmù bu mpàndànjlà ne nya kalemba nyama, ewu musangu ndi nya bu udi uya kalemba nyama, eku mwikàle mpàndànjlà. Pa nànkù, kwòkò aku—kwòkò aku, mu mùshindù ònsò wà kubwela ànu muntwamu kufika kùdìbo. Ne Mwanèètù Mattsson-Boze ùdi díbà adi mu mudimu, ùteeta bwà kumbweja, kulongolola lwendu bwà mèmè kubwelamù bwà kulemba nyama. Èè, díbà adi, ndi mbwelamù mu lwendu alu, pashiishe neàmbè ne: “Mwanèètù Branham ùdi mu ditùnga emu.” Kupweka ku Ambassade ne: “Bìdikù mwà kwikala bimpè bu twètù mwà kwenzakù kaadisangisha kakesè anyi?” Nwamònu anyi? Aci’s cìdi cìdikùtula díbà adi, ne dyumba ditùngunuka ne kwenjiibwa. Pa nànkù katwèna bamanyè ne nediiikalèku anyi kadyàkwikalakù, netwikale bakùmbàne bwà

kudyènza, anyi to. Tudi munkaci mwà kuteeta. Ne ndi mulòmbe Mukalenge, cintu kampànda cyôci cyenzèke cidiye kàyì mwà kwitaba to, dîbà adi neciikale cimanyinu kùndi cyà ne ndi ne cyà kwalukila muneemu mu Jeffersonville ne kuyiisha *Mpungi Mwandamutekète*, lwà mu ngondo wa Kashipunkènza anyi wa Cimungu wa mashika, mwaba kampànda kuntwaku.

⁵ Nènkù dîbà adi, twètù bènzè nànkù, netwǎnjì kumòna leelù ewu, netùteetè bwà kupeta cibambalu cyà tùlaasà eci cidi cyela mashika, bwalu ncifwànyine kwikala cimpè ne citalalè. Cidi cisòmbesha bantu cinunu ne nkàmà yitaanu ku cinunu ne nkàmà mwandamukùlù. Nènkù mmwaba ùdi ne byamù bifidi byà mashika munda, ànu mupya ne bupya bwàwù, ànu mu ntàntà wa pabwîpi apa lwà kumutù eku. Kàdi musangu kampànda tuvwa bacilòmbe, kàdi kabàakaswà kutùpèeshaci to. Kàdi muntu uvwa kàyì muswè bwà twètù kucipeta awu wàkiipaciibwa mu kasumbù kalombodi. Nànkù mpindyewu, muntu udimù mpindyewu ùdi wàmba ne tudi mwà kucyàngata pa dîbà kanà dyònsò ditùdi naaci dijinga. Pa nànkù tudi—tudi ne disànkà dyàbùngì dyà kucipeta. Nènkù tudi mwà kupeta mùshindù wà kucipeta mpindyewu, ne misangu mikwàbò mu ngondo wa Kashipunkènza, ne kwikala ne. . . Mbanganyì bàdi baswè kwikala bàsambila, piikalàci diswà dyà Mukalenge mpindyewu, bu cintu kampànda mwà kutùbèngela?

⁶ Nudi bamanyè's, ntu munanga Arizona. Nditùnga dilenga. Ntu mujingejinge bwà kwikalamù.

Bu wèwè mwà kucisàkakù kuulu ndambù, Mwanèètù Ben, bu wèwè mwà kuswà, piikalàbi ne cidi. . . Kaa, aci. . . Èyowà's, mukalenge. Èyowà. Anyi, ní nganyì yònsò udi pa cyôci aci, ùdikù mwà kucibàndisha ndambù kakesè, bwalu ndi ngaalukila ku cyôci aci cyà bushùwà. . . [Muntu kampànda ùdi wàmba ne: “Mukàbà wà mèyi, bânà bèètù.”—Muf.] Wamba ne? [“Aci's cidi ànu mikàbà yà mèyi.”] Kaa, ànu mikàbà yà mèyi cyanààna. Kaa, s'ki mukwàbò nyèyè ewu apa. Mfwilaayiku luse. Èyo, Mwanèètù Ben. Pa nànkù mèmè. . .

⁷ Pàndi mfùma ku Arizona, pàndi ngàalukila muneemu, bitu bimpàcisha dìyì ndambù, bwà dishintuluka dyà kuulu. Mùnwemu tudi ne citaleela, cyà ciipacila byà pa lukàmà makumi mwandamukùlù ne mwandamutekète too ne ku makumi citèemà, ne mîngà misangu lukàmà pa lukàmà. Kàdi kwòkò aku cidi cifika too ne ku cijèngù, ne pashiishe mînga misangu, pankàcìnkaci, cyà pa makumi àbìdì cimwè cyà byà pa lukàmà cimwè byà citaleela. Udi musòmbèlè ànu mu ntentà wa mbòmbone's. Ne pashiishe kupàtuka mwinshì amu, kulwa apa, nudi bamanyè dishiilangana dinène didici cyènza mu wèwè. Pa nànkù cidi citàcisha dìyì dyèbè, ne bikwàbò.

Cyalùje mwaba ùvwàci, bu wèwè mwà kuswà, Mwanèètù Ben. Mvwa mwenze cilèma mu dicibàndisha. Mvwa ngèela

meeji ne ke mùvwàci, kàdi lwà kuulu *eku* ke mwaba ùdìbo bacìbàndishìla.

⁸ Mpindyewu tùsambidìlaayi, muntu yònsò wa kunùdì. Ndi nnwànyisha be. Billy ùvwa ùngambila bwà muntu kampànda udi mutùtwàdìle citungà cyà bimuma byà péches, nènku ànu mapà makesè ànùtù. . . Ndi mupange too ne mwà kunùsàkidìla mwinè. Ncyèná—ncyèná mumanyè mwinè mwà kucyènza to. Nènku ndi—ndi ndyùmvwa nciyi mukùmbànyine bwà kwangata bintu bu nàнку kunùdì to. Ndi ndòmba Nzambi bwà kunùbèneshayè, kàbìdì ndi mumanyè ne Yèyè neànùbènèshè, bwalu Yèyè wàkamba ne: “Byònsò binùdì nwenzela umwe wa ku bakesè aba, Mèmè ngunùdì bacyenzèle.” Nènku Nzambi neànùbènèshè, ndi mutwìshìibwe.

⁹ Nènku bu mùdì Arizona mwikàle ditungà bulengadì nùнку ewu, kùdì ànu cintu cìmwèpele cìdì cìmpangìke, ciinè aci, nnwènù bònsò aba. Ncyà bushùwà. Nudi bampangìke nwènu bònsò. Ncyèná—nànsha mèmè muya penyì, ndi—ndi. . . kacyèna, kí nwènù to. Ndi ne balundà, myaba yònsò pa buloba bujimà, kàdi kí—kí—kí nwènù bònsò to. Kùdì cintu kampànda cìdì cìtàngìla kasùmbù kakesè aka kàdi ànu. . . Ncyèna mumanyè to. Ndi ngèèla meeji bwà bwalu bwàbò.

¹⁰ Nènku ku Tucson, ncimenga cyà babandindi, nudi bamanyè's, ne maèkèleeziyà àdi ànu munkaci mwà kukòka, nudi bamanyè's. Mbyènze bu bikolè. Kí mbàà nyumà bikolè to; nènku, mbwalu kùdì ditembangana, dyèbè dyà dikolè edi; ke didì dibikolesha. Bu mèmè mwà kwikala neenù bònsò bwènù, kusangisha ne èkèleeziyà ewu, pàshìishe kusòmbela kuntwaku, ndi ngèèla meeji ne bivwà bifwànyine kwikala bimpè. Nwamònu anyi? Kàdi ndi ncinka ne, bu mùdì ànu eci cishààle èkèleeziyà, ne nwènù bònsò nutungunuka ànu ne kulwamù, mèmè nentungunuke ne kwikala mwaba ewu, too ne mwàlwà Yesù.

¹¹ Pa nàнку nsambidìlaayi, bu mùmvwà mwàmbe kùkaadi katanci. Ncyèná njinga kucyàmbulula to, kàdi pàndì mfika kumpàlà kwènù, ndi—ndi ngùmvwà mijilu mintàndàbàle, nènku ndi ngùmvwà cisà, ne maajiya, ne cilunji cìshintuluka, kàbìdì. Ntu nàнку, pa ciibidìlu, pa nàнку ndi. . . cìdì cìnsùnsùlula mèmè yònsò munda emu. Kàdi bwà kumanya ne mwaba wònsò wùndì mwà kuya. . . Ncyèna ne ka—kasùmbù pa buloba, kàndiku mumanyè, kàdi naanyi kalamandindi bu kasùmbu aka to. Nzambi ànyishèku—ànyishèku bwà twìkalè katùyì mwà kutàpuluka to, bwà ne, mu Bukalenga buciwalwà, ànyishe bwà twìkala pàmwè; ke disambila dyànyì.

¹² Mvwa musòmbè ku ciibi eku, nyiikilangana ne Bill Dauch ànu mu katanci kakesè cyanààna aka kumpàlà kwà kulombola muntu kampànda kumwaluja kùdì Kìlistò, cyàkàbìdì, mu cibambalu cikwàbò mwàmwa. Kàdi musòmbè mwaba awu

nyiikila nendè, muntu wa bidimu makùmi citèèmà ne címwè, kwambayè ne: “Ndi—ndi ngènda mpòyoyonga. Mèsù àànyì kaèna mùvwàwu ne cyà kwikala to.”

Nènkù ndi ngèèla meeji ne, kùkaadi bidimu bìbìdì, mèmè kulwa kùdiye pàvwàye ne mwoyi wà munda wènda bitekète ne wimana, mwikale ùpùnga ne lufù. Ne ngàngàbukà mwinè uvwa umwondopa, uvwa mwàmbe ne kàvwa mwà kusàngala to awu, ngàngàbukà awu’s mmufwè. Kàdi’s ki Bill Dauch ewu musòmbe, nwamònu’s, wa bidimu makumi citèèmà ne címwè. Mèmè kwamba ne: “Bill, kùcyèna ne dikwàcisha pa buloba apa to bwà bìdì bìtàngila dyenza dyà mudimu ne bintu byà mùshindù awu. Kàdi ndi ndòmba eci, ‘Nzambì àkupèshè makànda,’ bwalu udi munange masangisha bikolè.” Muntu mulùmè wa bidimu makumi citèèmà ne címwè awu ùdi ùkòsolola ditùnga edi mu màshinyì, nànsha kwòkù luuyà, kuumìnyine, mashìka, dipanga kucyùka dyà maalu, ní ncinyì ní ncinyì, bwà kuya katèeleja Dìyi. Nzambì àbèleshè musùukà wà bukitù awu. Mpindyewu ncyèna ne . . .

¹³ Ndi ne cyà kunùlomba luse cyàkàbìdì, bu múndi munùlamè mùshindù ùmvwà munùlamè mu dindà awu, mu mēbà àsàtù bulubulu. Ne ncyèna mukòse cilumbu cyà mukenji awu bimpè to, bwalu ndi muwùkòse citùpà, ne mushiye citùpà cyàwù, ne mutùpìke citùpà cyàwù, ne bikwàbò. Ki bwà cinyi mvwa mubambìle bwà kwanji kulamabò mukàbà wà méyì awu. Indìlaayi ngwangàcile kàbìdì mwaba kampànda ùdìku citalèèle awu anyì cintu kampànda. Nènkù mvwà—mvwà—mvwà mwà kuumvwa Nyumà, kàdi ndi munùtàngìle ne mumanyè ne nudi munkaci mwà kudyèla lupeepèlè ne mumanyè ne nudi ne luuyà, nènkù—nènkù aci cidi cinsùsulula tupese tupese. Ncyèna muswè bwà nwènù kukèngà to; ndi—ndi muswè bwà nwikalè bacyankàme. Nwamònu anyì? Nènkù cyòci aci cidi cincyòkesha.

¹⁴ Byenze ànu bu, pàndì mmòna babèèdì; mèmè nciyì mwà—mèmè nciyì mwà kuumvwa luse bwà babèèdì abu to, ncyèna mwà kubàmbulwishakù nànsha kakesè. Ndi—ndi ne cyà kubùmvwila luse. Nènkù bìdì mùshindù ùmwèùmwe awu bwènù—bwènù nwènù; ndi—ndi ne cyà kunùmvwila luse, kabìyì nànkù to ncyèna mwà kwikala mwanèènù to. Nwamònu anyì? Ndi—ndi ne cyà kunùmvwila luse. Nènkù, ntu ngèza nànkù; Nzambì mmumanyè ne aci mbulelèlà.

¹⁵ Nènkù mpindyewu, dilòlò edi, nèndifilè ku disambidila dyà babèèdì.

Nènkù ndi muswè bwà . . . muntu, ne kubèleshaku bantu aba, ne Mwanèètù Collins, ne Hickerson, Mwanèètù Neville, Mwanèètù Capps, balubuludi, ne bònsò, bwà milubù mitàmbe bwimpè yìvwà munkaci mwà kulwa, mùshindù mwinè unùdì batèèke bulongàme’s wè, mu èkèleeziyà, ne mwinè mùdì cintu ne cintu cidìlona pa kaaba kààci kàdi kacikumbànyine.

Ndi nnusàkidila balùmyànà. Mukalenge ànùbènèshè bwà kuteeta bwà kutungunuka ne kutèèka bulongàme. Nènku ndi mpeta mikàndà mitentàmàngàne yilwa kùndi mu Tucson, ne: “Mwanèètù Branham, kabyèna mùvwàbi kale to. Mbishiiàngàne bikolè, njiyà mibènèshiiibwe yà Bwikadi bwà Nzambi.” Nènku ndi—ndi ne kusàkidila bwà cyôci aci. Mukalenge ànùbènèshè kashidi!

¹⁶ Dìbà adi, mpindyewu, dilòlò edi, mvwa mbala kaaba aka mu Mifùndu ndambù kaaba kakesè, bwà—bwà pàmwàpa kupàtulamù ndambù wa mèyi, bwà kwakula ne kubala Mufùndu, ne pashiiše ndambù wa Mifùndu, pashiiše kwakula neenù bwà katanci kakesè ne pashiiše kusambidila babèedi. Kàdi ànu katanci kakesè cyanàànà; ndi munkaci mwà kutàngila ntankù, nènku nènteetè bwà kucyènza ànu ne lùkàsà lwónsò. Kàdi ndi ngèèla meeji ne pàdi musumbà wa bantu badisangishe pàmwè, kabàyi bàbala Dîyi anyi bènza cintu kampànda, dikànkamika kampànda, disangisha kî ndifwànyine kwikala dikumbànàngàne mu kaabujimà to.

¹⁷ Bààbúngì bàà kunùdi mbindile. Bààbúngì bàà kunùdi bàcidi ne kilomèetà yà lwendu yà kwenza dilòlò edi. Ndi ngányisha aci be! Mùshindù mwinè ùndi nkènzakana ne mmòna muntu ne muntu yónsò, ne ngèèla meeji pa bwalu abu... Mu Arizona mwàmwa, ndyàmbidila ne: “Pàndi mmumòna kàbìdi, ndi mpweka dyàkàmwè ne nkamulabula ku cyanza ne mmwela citupà ku nshingù.” Nènku’s ki wèwè ewu musòmbè kaaba aka, ne nganyi, mpenyi pàndi mwà, nudi bamanyè anyi? Ncyènà mumanyè nànsha mwinè wa kutwàdija nendè to, ne nganyi. . . mùshindù mwinè wà kupàtùkamù. Kàdi, èyowà, ndi munùnangè. Nzambi mmunùnangè, kàbìdi.

¹⁸ Mpindyewu ndi ngèèla meeji ne, mèmè nciyi mutùpàkàne to, mèmè nciyi mwangàte Mufùndu wà—wà cyanàànà mwaba ewu to, ndi muswè kubala mu Kolintò Wakumpàla, nshapità 1, kubangila ku mvensà wa 18, ne kàbìdi kubala Kolintò Mwibìdi 12.11, bwà kwangata cyena-bwalu. Mpindyewu bu mèmè mwà kuyipetaku pa lùkàsà, nènku dìbà adi netùyibale, pashiiše netùbale, ne pashiiše kusambila ne kutwàdijilamù, ànu kwakulaku neenù tusunsa tukesè cyanàànà pa cyena-bwalu cikesè. Mu Kolintò Wakumpàla, nshapità 1, kubangila ku mvensà wa 18.

Bwalu diyiiisha dyà nkùrusè didi dikùtakana kùdi aba bàdi bàbütuka; kàdi kutùdi twètù bàdi basungidiibwe didi bukolè bwà Nzambi.

Bwàlu bààkafùnda ne: Nényangakajè lungènyì lwà beena lungènyì, ne nèndyatakajè cyumvwilu cyà batàlàme.

Mwena lungènyì ùdi penyi? mufùndi ùdi penyi? mukokyanganyi wa pa buloba ebu ùdi penyi? Nzambi kî

mmuvwije lungènyì lwà buloba ebu dikùtakana anyi?

Ndi mwà kuwùtèèla kàbidì anyi? “Nzambì kî mmuvwijè lungènyì lwà pa buloba ebu dikùtakana anyi?” Lungènyì lwà pa buloba ebu lùdì cinyi dîbà edi? Dikùtakana.

. . . Nzambì kî mmuvwijè lungènyì lwà pa buloba ebu dikùtakana anyi?

Bwalu paanyimà paa cyôci aci mu lungenyi lwà Nzambì bàà pa buloba ku lungenyi kabàakamanya Nzambì to, kàdi byàkasànkisha Nzambì ku dikùtakana dyà diyiisha bwà kusungila aba bàakiitabuujà.

Ndi mwà kubalulula mvensà awu anyi? Tèèlejàayi ne ntèmà yônsò.

Bwalu paanyima paa cyôci aci mu lungenyi lwà Nzambì bàà pa buloba ku lungenyi kabàakamanya Nzambì to, byàkasànkisha Nzambì ku dikùtakana dyà diyiisha bwà kusungila aba bàdi bìitabuujà.

Bwalu beena Yudà bàdi bàlòmba cimanyinu, . . . beena Ngelikà bàkèba lungenyi:

Kàdi twètù tudi tuyiisha Kilistò wakeediibwa ku nkùrusè, dibwe dyà cilèndwishi kùdì beena Yudà, . . . dikùtakana kùdì beena Ngelikà;

Kàdi kùdì aba bàdi babùikidiibwe, beena Yudà ne beena Ngelikà bônso, Kilistò bukolè bwà Nzambì, ne lungènyì lwà Nzambì.

Bwalu dikùtakana dyà Nzambì dìdì lungènyì kutàmba muntu; ne butekètè bwà Nzambì mbukolè kutàmba muntu.

¹⁹ Ne mu Kolintò Mwibidì nshapità wa 12, mvensà wa 11, Pòlò ngudi wakula.

Nakalwa mukùtakàne mu kuditumbisha; nwènu mbàkangenzeja: bwàlu mwà ne cyà kutùmiibwa kunùdì nwènu: bwàlu ncyèná mushààdìle ku cintu nànsha cimwè kùdì munène menemene wà ku bàpostòlò to, nànsha mùndì mene nciyi cintu emu.

²⁰ Tùsambilàayi. Mukalenge Yesù, sàkidilà ku mèyi makesè aa, dilòlò edi, àdì makùdiibwe mu matùkù mapite aa, kùdì mùpostòlò munène Pòlò, bwà twamònà mwà kutanta ku diwùmvwa dilòlò edi, mu diàtèèka mu nsòmbelu yètù, bwà twètù kwikala mu—mudimu wa byanza wà Nzambì, benza mu lwidì lùvwàYe musungùla bwà twètù kwikalamù alu. Bwalu tudi tulòmba nùnkù mu Dìnà dyà Yesù. Amen.

²¹ Nènyiiishè dilòlò edi bwà tusunsa tukesè, bu Mukalenge mwà kwanyisha, pa cyena-bwalu cyà ne: *Cimonyamonya*. Mpindyewu, aci’s ncyena bwalu cyùmè ncyoncyoncyo,

cikàyàbàle bwà kwangata's, kàdi ki mùdici, ngèela meeji, cifwànyineku kuleeja bintu mùshindù ùndi muswè kubyamba.

²² Nudi bamanyè's, kùdi bintu byàbùngi be, leelù ewu, mùdi bantu bàshaalè *bimonyamonya*, mutùdi tucibiikila. Nènku cyòci cyakwidi aci, muntu yéyè kacya kàyì mwânji kucitèeleja to, cidi cyùmvwija muntu kampànda wa “pabwèndè,” muntu kampànda udi “ukèmesha” bwà muntu mukwàbò. Ne kakùyì mpatà to bààbùngi bàà kutùdi tudi bàà pabwàbò, muntu kùdi mukwèndè.

²³ Nènku, mpindyewu, mvwa ngènda mpweka ne mùsèèsù musangu kampànda mu Los Angeles, mu Californie, ki mémè kumòna muntu kampànda wa ukèmesha menemene, wènza maalù mu mùshindù wà ukèmesha. Nènku ùvwa wènda ùpweka ne mùsèèsù, kàyì bu mubèengi wa mudimu to, kàdi ùvwa ànu bu muntu ùnyùnguluka mu mapingaja. Ki mémè kuya ku luseke lukwàbò lwà mùsèèsù, bwà kumòna civwàye wènza aci. Muntu yònsò ùvwa ànu ùkùdimuka, ùmuseka, bwà diikala dyèndè dyà wà pabwèndè adi.

Mémè e kumòna ne ùvwa ne cimanyishilu mumpalà mwèndè amu. Ki mémè kudyàmbidila ne ndi mufwànyine kumòna civwà bantu bònsò bàseka, muntu uvwa ukèmesha ewu, wa pabwèndè ewu. Nànku yéyè ùvwa. . . Ki mémè kumumòna pàvwà bantu bàmutàngila apu, bàvwa bàmuseka, nènku—nènku, kàdi ùvwa ùmwèka bu uvwa ne mimwemwe yà mùshindù mushiilàngàne, mimwemwe yà musàngeelu. Mimwemwe mikwàbò yìvwà bantu bàmfukishila yìvwa mitàmbe kwikala yà dimupwekesha naayi milongo, kàdi ùvwa ùmwèka musankishiibwe mu civwàye munkaci mwà kwenza aci.

²⁴ Èè, aci's ncyà kwelela meeji àà mu ndòndò, díbà dìdi muntu musànkishiibwe mu cidìye wènza ne ncìmpè. Nànsha mùdiye cimonyamonya kùdi mungà muntu amu, piikalàye musànkishiibwe ne cidìye munkaci mwà kwenza aci ncìmpè, díbà adi mulekèlaayi àshaalè naaci.

Kàdi ndi mwenze ànu nseemena pabwìpi ne nsongàalùmè mukesè awu, mémè e kumòna. . . lwà pa cyàdi cyèndè apa, piikalè citaata anyi mbòdi kampànda, bàvwa bafundepù ne: “Ndi mupàle,” nènku lwà kwinshì eku, kùvwa ne: “bwà Kilistò.” “Ndi mupàle,” mu màleetà manène; lwà kwinshì eku, wàmba ne: “bwà Kilistò.” Nènku bantu bònsò bàvwa bàseka cyòci eci.

²⁵ Nènku pàvwà nsongàalùmè mukesè ewu muntùngùnùke ne kupweka mu musumbà wà basekyanganyi ne lukutukutu alu amu, Mémè e kukùdimuka bwà kutàngila civwà paanyimà pèndè. Nènku kuvwa cikonkelu cinène menemene paanyimà pèndè apu, nènku lwà kwinshì aku, cyàmba ne: “Mpindyewu wèwè udi mupàle wa nganyi?”

²⁶ Èè, mémè—mémè kudyàmbidila ne ùvwa ne cintu kampànda muntwamu, nudi numòna's, kàdi ùvwa ùmwèka musànkishiibwe bwà mùvwàye mwà kwikala mubùlùke wa Kilistò amu. Nènku's

ki cyàkàmba Pòlò ne ke cìvwàye mushààle aci: “mubùlùke” bwà Kilistò.

²⁷ Mwanèètù Troy, wa mu Beena Kantu-ku-byanza bàà Èvànjeeliyò mu Kaabujimà, mulunda wanyì wa katàpula katèèkà, yèyè—yèyè mmusaayi wa minyìinyi. Kàdi ùvwa mupeté kishì mu cyanza cyèndè, kuumùkile ku disaaya dyà ngulube musangu kampànda. Muntu mulùmè kampànda udi mumanyè, anyì muntu mukàji, mmufwànyine kumanya ne kàvwa nkishi kaayi kiinè aku; kàdi ne—nekàkudye kàkumana. Pa nàнку, bwà kusungila mwoyi wèndè, bìvwa bìkèngela bwà ku—kumukòsa minu yisàtù. Nènku ùdi ànu ne minu yìbìdì cyanàànà ku cyanza cimwè, kàdi nànsha nàнку mmushààle ànu musaayi wa minyìinyi.

²⁸ Nènku kùvwa mwena Allemagne mutekète ùvwa ùkwàta nendè mudimu pàmwè mu nzùbu wa disaayila minyìinyi, mu Los Angèles mwàmwa, pa nàнку yèyè—yèyè kutùngunuka ne kuteeta bwà kulombola Mwena Allemagne mutekète ewu kùdì Kilistò. Nènku ki yèyè kwamba ne: “ùvwa Luthérien,” ne ciinè aci cìvwà cimukumbànyine. Yèyè ùvwa musànkishìibwe bu mùvwàye mwena Kilistò, bwalu ùvwa wa mu èkèleeziyà wa ba “Luthérien” awu, bu mùvwàye wàmba amu. Nàнку ke dilòlò kampànda Mwanèètù Troy kupetayè dyèsè dyà kumufikishayè ku diya mu èkèleeziyà.

²⁹ Dìnà dyèndè ùvwa Henry. Nènku Henry mu cyena Allemagne, didi “Heinrich,” nàнку awu bàvwa bàmbùkila “Heini.” Nukààdikù bùmwè mbìikidilu awu. Kwambayè ne: “Heini, udi wamba bishi bwà kuya naanyi mu èkèleeziyà dilòlò edi?”

³⁰ “Èè,” mwàkambàye, “ngèèla meeji ne nènye.” Pa nàнку e kuyayè mu disangisha kampànda dyà cyena-kale mùvwàbo ne disangisha dyà milòmbò, ki kubwelayè bulelèlè mu ditwishiibwa, ne kufilayè mwoyi wèndè kùdì Kilistò.

Kaa, ditùkù dyàkalondà, mwena Allemagne mutekète ewu ùvwa munkaci mwà kucyònkomoka. Ku musangu ne ku musangu ùvwa ànu mufwànyine kutàmbakana mu nzùbu amu, ne byanza byèndè byela muulu, wàmba ne: “Butùmbi kùdì Nzambi’s wè! Twasàkidila, Mukalenge Yesù!” nènku ùvwa ùkòka ntèmà yà bònso, yà bònso bwàbò.

³¹ Nudi numòna’s wàkashààla cimonyamonya kampànda mu mulongo mujimà wà basaayi bàà minyìinyi abu. Nènku ùvwa mwà kwikala munkaci mwà kukòsa munyìinyi, kàdi ùbanga kwela meeji kùdì Mukalenge, nènku ùvwa mwà kukùtula mwadi. Ùvwa mwà kutèeka keelè panshi, ne kubanga wàbànda wàpweka ne tujila atu, kàyì ne mutù munyùngùlùke to, cìkòlà ùnanga ànu Kilistò, wàmba ne: “Kaa, mùshindù mwinè wùndì muKunange’s wè, ‘Yesùs!’” Nudi bamanyè’s, wàpingana paanyimà wàtwa kumpàla.

32 Kàdi ki mfùmù wa mudimu kulwayè mwaba awu e kumumònayè wènza nànkù, nènku pàvwàye wènda ùpweka apu, munkaci mwà kwela mbilà. Nènku, mfùmù wa mudimu, yèyè kàvwakù mumòne mfùmù wa mudimu to; ùvwa munkaci mwà kwelangana meeji bwà Yesù. Ki kubangayè kupweka, ne byanza byèndè byela muulu, ne binsonji bimupwekela pa matàma, wàmba ne: “Éyì Nzambì, mùshindù mwinè wùndì muKunange’s wè!”

Ki mfùmù wa mudimu kwabayè ne: “Heini, ncinganyi menemene cidi cikwenzekèle’s?” Yèyè ne: “Bantu bônso mu—mu mulongo mujimà emu bàdi bàcyàmba. Ncinyi menemene cidi cikwenzekèle wèwè ewu’s, Heini?”

33 Ki mwena Hollande Mutekète ewu kwabayè ne: “Kaa, mfùmwanyì wa mudimu!” Yèyè kwamba ne: “Butumbi kùdi Nzambì, ndi musùngidìibwe!”

Yèyè ne: “Udi mwenze cinyi?”

Yèyè kwamba ne: “Ndi musùngidìibwe!” Kwabayè ne: “Mvwa muyè ne Mwanèètù Troy lwà kwìnshì eku ku kadisangisha kakesè, nènku ndi—ndi musùngidìibwe. Ki Yesù kubwela mu mwoyi wànyì, nènku mèmè ndi mùle tètè ne dinanga!”

Yèyè ne: “Udi ne cyà kwikala muyè ku musumbà wà bapàle awu.”

34 Yèyè kwamba ne: “Èyowà!” Yèyè ne: “Butumbi kùdi Nzambì’s wè!” Yèyè kwamba ne: “Twasàkidila Nzambì bwà bapàle!” Yèyè kwamba ne: “Udi mumanyè’s, wèwè mwangàte màshinyì àdi ènda àpweka ne njila, kàdi wèwè kuumusha màlu wônso àdiku awu, kwènà ùshààla ne cintu cikwàbò to ànu ‘bilatalata nkààyabì!’”

35 Èè, ncyèna mumanyè to kàdi mwena Hollande mukèsè awu ùvwa ànu bu mubìnge’s. Kupàtula màlu wônso awu? Màlu’s ki àdi macilamakàjè pàmwè. Nènku ndi ngèèla meeji ne ki àdi malamakajè èkèleeziyà pàmwè mिंगà misangu, malamakajè dishidimuka pàmwè.

36 Mpindyewu, pàmvwà nguumukila ku dikamòngana ku Prescott, matùkù makesè aa, mvwa munkaci mwà kutàngila mu cipèèlà ne kumòna mùshindù ùdìbo ne madimi à cyena Japon awu mu Phoenix mwàmwa, ne bàvwa ne bilòngò muntwamu, bilòngò bilenga. Mwòmò amu, pàmvwà nsongàalùmè muntwamu, mvwa ndiisha ngombe mu yôyi myaba ayi. Ngombe, kamùvwa mashindà to, pa nànkù yìvwa yìdya ànu ntùlu, nkùnda, ne bikwàbò.

37 Nènku pashiishe mèmè kumòna ne mùvwa divu—divulangana dyà bintu byà mu cipèèlà. Nènku mu cipèèlà tudi tusangana ne, mudi ntùlu ne bilòngò. Nènku mu nzùbu mwànyì mwàmwa, anyì nzùbu utùdi tufucila awu; Mwanèètù

wa bakàji Larson, ngèèla meeji ne ùwwa kaaba aka mu dindà emu, mvwa mumumòne. Ùdi ne kaabudimi kàà bilòngò pambèlu pàà—pàà nzùbu awu; ndambù wa buloba. Bintu byònsò muntu amu bìdi ànu lusenga, pa nàнку ùdi ànu ne ndambù wa buloba mu kaabudimi kakesè kàà bilòngò ku luseke ne ku luseke lwà nzùbu udi mulamàkàne aku. Nènku dindà dyònsò ndi ne cyà kwikala mpàtuka ne kwela màyi ku bilòngò abi. Mémè nciyi mubyele màyi to bìdi bífwa. Nènku nebiikale. . . Nènku pa díbà adi, cyàkàbìdi, ndi ne cyà kupeta ndambù wa bwanga bwà kubìpwidijila, bwà kubilama ku twìshì; cyanààna bìshì bìdi mwà kubidya kubibùtula.

³⁸ Ne pashìshe paùdi ànu uya ntàntà mukesè usambuka apu, mu mètres citèemà ne apu, kùdi bilòngò kampànda munkaci mwà kusampila, ne pambèlu mu cipèèlà bìdi munkaci mwà kusampila. Nènku nudi mwà kuumbula mu ndòndò wa mètres àsambòmbò ne ncifwànyine kwikala ànu kapyà kàà mu cingoma pa kwòkò; kakùyì cìnga cintu to ànu lupwishi pa lwòlò, ne kamùyì nànsha kamata kàà màyi kàmwè to. Kàdi nganyì udi ubimiyamina bwanga? Nwamònu anyi?

Ebi bìdi mu kaabudimi kàà bilòngò, wèwè ànu mupangile kubimiyamina bwanga ne kubyèla màyi, muswàswà anyi bìshì, twìshì, nebibidye. Kàdi kìshì kakèena mwà kulenga cidì mu cipèèlà cyàcyà to, anyì cyòci ciinè kacyèna ne cyà kwengelekiibwa ne kwediibwa màyi ditùkù dyònsò to; ncintu cyenza kùdi Mufùki. Eci ncintu cipàtula mu disopakaja.

³⁹ Ne ndi ngèèla meeji ne, leelu ewu, cidì cyènta ne bwena Kilistò mmbulwè, mupàle, kùdi bantu; mbwalu tudi ne musùmbà wa bintu bitentula ne kabiyi beena Kilistò bashùwashùwàlè to, musùmbà ùdi ne cyà kwengelekiibwa, ne kwediibwa bwanga, bwà kushààlabu mu èkèleeziyà.

⁴⁰ Ndi mwà kudifwànyikijila Èkèleeziyà wakumpàla menemene awu, cìvwàbo, ne kucifwànyikija ne udi muditòlòkèle leelù ewu. Ewu ùdi mwà kwikala cintu cyà mushinga mukesè ku cìvwà Èkèleeziyà wakumpàla awu, beena kwitabuuja bakàyàbàle mu Nzambi abu, biikàle ne Nyumà Mwìmpè. Kanwèna nubengeleka to. Kanùvwa ne cyà kubàtuuta tuumapi pa makaaya ne kubàmbila ne nenùbàbweje mu ewu ewu to; ne yèyè awu mubàtonda, bàdi bàya ku mukwàbò; ne nenùmuvwije mulami bu yèyè mwà kulwa mwab'ewu ne kushiya mukwàbò awu. Aci's ndivulangana disopakaja.

⁴¹ Mvwa munkaci mwà kwela meeji bwà dizòlà dyà bangabanga dyà Michelange, ngèèla meeji, dyà “Didyà dyà Dilòòlò dyà Ndekeelu.” Ngèèla meeji ne yèyè ki wàkadizòla. Nudikù bamanyè mushinga ùdi dizòlà dyà bangabanga adi mwà kunùlòmba anyi? Binunu byà ndola kabiyi kubala, kì mbifwànyineku kulenga dizòla dyà bangabanga adi to, bwalu ndisambùke pa mushinga mene. Didi ne mushinga mutàmbe

kutumbuka! Kàdi udi mwà kusumba dyenzulula dyàdi ku ndola mitwè ku yibidi.

42 Ki bwà cinyi bantu leelù ewu kabèèna mwà kuumvwa bukàyabàle bwà beena kwitabuuja balelèlè, bashùwashùwàlè abu nànsha. Bàdi bàlwa bapàle. Nudi bamanyè's, buloba bùdi bwènda bùlwa mu ngiikàdilù wa bikudi mu mùshindù wà ne ku musangu ne ku musangu bikèngela wèwè kupetaku mupàle bwà kubùlongolola. Bikèngela muntu kampànda kubwelayè mu cyalu udikù mushiilàngàne ndambù, ne mwikàle mupàle kùdi lukòngo alu. Mvwa munkaci mwà kwela meeji ditùkù adi ne: nganyi udi mukumbàne?

Udi kàyì mupàle leelù ewu nganyi? Udi mupàle bwà muntu kampànda. Ndi ngiitabuuja ne buloba bùdi munkaci mwà kupaala ànu byà menemene ebi. Nuvwakù bamanyè ne ncikondo cidi bantu kabàyì mwà kujingulula pankaci pàà bwimpè ne bubì, anyi bulelèlè ne mashimi anyi?

43 Nudi bamanyè ne beena cidiidi kabèèna mwà kujingulula bwimpè ne bubì anyi? Nudi nubàmòna bàshààla bapùwe bwà kusungula ne Bible ewu àlukile mu èkèleeziyà anyi mu... bwà Bible kwalukilayè mu cilongelu? Kì mbamanyè ne nduseke kaayi lwàtuutà cipèèpèlè cyà cidiidi nànsha. Anji elàayibi meeji ku bwalu abu! Ncyèna mumanyè mùdibi mu Indiana mpindyewu to, kàdi mu ditunga dyà Arizona kubala Bible mu cilongelu kùdi kubèngàngana ne mikenji. Ngèèla meeji ne ncintu cimwècimwè aci mu Indiana, pàmwè ne États-Unis mujimà, bwalu mukàji kampànda mwena bupidyà wakashintulula ndongamu mujimà. Nènku, vùlukàayi ne, mbibèngàngàne ne mikenji bwà kubala Bible mu bilongelu byètù byà mbulàmàtadi, kàdi bitàdi byà beena kwitabuuja bìdi bitwa bupidyà mpàndà bwà kulongeshiibwabù mu cilongelu.

44 Cidiidi. Bìdi bitùkèngela mukwàbò Abraham Lincoln. Bìdi bitùkèngela mukwàbò Patrick Henry. Tudi tukèngela mwena Àmèrikè udi mwà kukàndameena kàyì ùcyùka cidi cidiidi, ne kubìikila cimpè ne, “ncimpè,” ne cibì “ne ncibi.”

45 Nuvwakù bamanyè ne bayiishi leelù ewu kabèèna mwà kujingulula ne cidi cimpè, nDìyì dyà Nzambì anyi èkèleeziyà wa dìngumba anyi? Kì mbamanyè njila wa kulonda to. Kabèèna mwà kujingulula pankaci pàà bwimpè ne mashimi to. “Ndi mumanyè ne Bible ùdi ùcyàmba, kàdi èkèleeziyà wetù ùdi wàmba...” Nwamònu's, bantu kabèèna ne bukolè bwà kujingulula cimpè ne cibì to. Nènku cintu cyònsò cidi cibèngàngana ne Bible ncibi. Dìyì dyà Nzambì ndilelèlè, ne dìyì dyà muntu yònsò didi mashimi, didi dibèngàngana naaDì adi. Ne kuteeta kwimanyina mpindyewu pa ci—ci—cikondo bu aci nànku, ne kutwà ku cidi cilelèlè, udi ushààla mupàle.

Tùteelàayikù bantu ndambù.

46 Ndi mwà kudifwànyikijila mupròfetà Noà, mu ditùkù dinène divwàye ne mwoyi adi; cikondo cinène cyà maalu à mamanya aci mùvwàbo bìibaka bipaapu byà misàkà ne mpìngù yà ntambwe yà mutù wà muntu, mùvwàbo mwà kushìndika ne kakùvwa máyì mu maulu, ku lukèbukebu lwà maalu à mamanya. Ki muntu mununu ulwàlwa ewu pambèlù pààpa, mwinè awu wàmba ne: “Kùdi kùlwa mvùla ùfùmina mu maulu.” Noà ùvwa mupàle bwà lukòngò alu. Wàkalwa mupàle.

47 Twānjāāyibi kutùma meeji kùdi Mòsà. Mòsà, pààkapwekàye kùdi Pàlò, bu mutùvwà twakula mu dindà emu, nènku Mòsà wènda ùya mutàngile kùdi Pàlò, ne wàmba ne: “Mukalenge mmuntùme bwà kupàtula bapika aba,” mwikàle ne dikombo mu cyaanza cyèndè, ùkùngàmangana ne cilwilu cinène civwà cicimùne buloba bujimà aci. Pàlò, mu meeji èndè ònsò à maalu à mamanya awu, wàkeela meeji ne Mòsà ùvwa mupàle. Nènku, yèye ùvwa mupàle, bwàbò bóbò.

48 Ndi mwà kutùma meeji kùdi mupròfetà Eliyà, mu ditùkù dyèndè dinène adi, díbà dyà cikondo cyà luumù cyà myòdelè aci; cikondo civwà Aakàbà ne Izàbèlà bàkòokèsha buloba, mutùdi mwà kwamba, mu matùkù awu; ne myòdelè yònsò ne bikwàbò byònsò bìvwà Izàbèlà muswè kulwàta abi, ne mùvwàye mwenzèje bakàji bònsò bwà kulwàtabò bu yèye amu, ne bilaabu byèndè abi, ne lukutukutu, ne myòdelè yèndè, mùshindù ùvwàye ùdyènzela yèye mwinè myòdelè. Nènku díbà divwà mununu kampànda wa cimfiikàmùndà bu Eliyà, ùbwela mu cyalu ne ùkàndameena ditùnga dijimà; kùdi Aakàbà, yèye ùvwa mupàle. Ncyà bushùwà.

49 Amòsà, mupròfetà, pààkalwàye ku Sàmaalèyà mu ditùkù divwa Sàmaalèyà bu Hollywood leelù ewu, bakàji mu mùsèèsù, bavwàle, bènda too ne masandi à pa bùtòkà, mùshindù mene ùvwàbo bàditwàla ne bènzà maalu pambèlù apu, bàlekela balùme. . .

50 Cyònsò ciikàle ànu masandi à pa bùtòkà, leelù ewu, ànu kumpàla kwènù aku mene. Mvwa muye mu mwaba kampànda dilòòlò adi, bwà kupeta cintu kampànda cyà kudyà, nènku twànà twà balùme ne twànà twà bakàji kuntwaku tùupukilangana ne tùtwangana mishìku kakùyì mùshindù to.

Kàdi udi mumanyè anyì, wèwè mwakùnyàànyì wa bakàji, ne aci mmasandi à mu mùshindù kampànda anyì? Díbà didì mulùme ùkutwà mishìku, mmwendè neebè masandi mu mùshindù kampànda. Kùvwa mwà kumulekela ùkutwà mishìku panùdi kanùyì basèlàngàne nànsha, bwalu tujilu twà masandi, ne twà bulùme ne twà bukàji twònsò, tùdi mu mishìku. Nudi nuumvwa anyì? Nènku díbà didì tujilu twà masandi twà bulùme ne twà bukàji tùdisanga pàmwè, nànsha byòbì biikàle penyì, nùkàdi bamanè kwenda masandi mu mùshindù kampànda. Nènku wèwè kùvwa mwà kulekela nsongàalùme awu ùkutwà

mishiku pàdi cibwikilu aci kaciyi cyumùshiiibwe mumpàlà mwèbè ne wèwè mushààle mukàjèndè nànsha. Kwènji aci to! Nkwenda kwà masandi. Nkusambakaja kwà tujilu twà masandi twà bulùme ne twà bukàjì.

⁵¹ Bwà cinyi mulùme kènà ùtwa mulùme mishiku, mukàjì kèna ùtwa mukàjì mishiku, ku mishiku? Bwalu kabyèna bisambakaja tujilu to. Bânà bàdi bàlediibwa ku disambakaja dyà tujilu.

Pa nàнку cidi kàbidì ànu bu masandi à pa bùtòkà, mwaba kanà wònsò. Tàngilàayi ku bimwènyi ne bintu byònsò binùdi numòna, dimacisha dyà luta ne—ne dyenza dyà maalu à macimbu. Kabyèna bikèmesha to mùdi maalu à busenji—mabànde cipidi's! Mmunyi mùdibo mwà kucyènta, bàsalulangana bònsò ku ditwà dyà bakàjì abu mishiku, pààbò bamanyè bimpè ne cintu aci mmasandi's! Nzambì kàkufwà cintu aci luse nànsha ànu wèwè munyingàlala.

⁵² Nènku mpindyewu, mpàakajuukà, mupròfetà munène ewu, Amòsà. Yèyè mmumanyike bu umwe wa ku bapròfetà bakesè bwalu kakùvwa byàbùngì bifùndiibwe bwà bwalu bwèndè nànsha, kàdi ùvwa ne Díyì dyà Mukalenge. Ne wàkatàngila cimenga aci, bònsò badifile. . . Mu mpangu myalàbàle, balùme basòmbe ne mabòko majìngila bakàjì, ne bakàjì pààbò ne mabòko majìngila balùme, ciine aci ànu Hollywood wa cyena leelù ewu! Ki kupwekayè wènda ùpicila mu cimenga amu, ne wàmba ne: “Nyingàlalaayi cyanààna nufwàfwa!” Yèyè ùvwa mupàle. Ùvwa mwenzè ànu bu mudyambe yèyè mwinè ne ùvwa mubùlùke, kùdìbo.

⁵³ Yone Mubàtiji, pàakalwàye mu cyalu, kùdi màngumba à ntèndeleeleu à ditùkù adi, yèyè ùvwa mupàle. Ùvwa ne mpùngà wa kulwa mwakwidi, bwà kulonda dikàsà dyà tatwèndè. Kàdi wàkabènga bwà kucyènta, bwalu Nzambì wàkamupàtula mu twitabàayi ne màngumba awu, bwalu wèndè mudimu ùvwa ne mushinga wàbùngì be. Ùvwa ne cyà kumanyisha Maasiyà ùvwa ulwa awu. Nènku pàvwàye kàyì ne cyà kwenza nànsha ne Bàfalèesà, ne Basàdokà, anyì ní ncinyi cyònsò ciwàku aci, wàkabènga musumbà wàbò wònsò awu, ki yèyè kwamba ne: “Kanùbangi kwamba ne: ‘Tudi ne Abraham bu taatù wetù to,’ bwalu ndi ngàmba ne Nzambì ùdi ne bukòlè bwà ku mabwe aa kujuudilaku Abraham bânà.” Kumpàlà kwà—kwà batèndeleeedi bàà matùkù èndè awu, yèyè ùvwa mupàle. Mmwòmò.

⁵⁴ Pàakalwà Yesù mu cyalu. Kùdi bantu batèndeleeedi bàà mu matùkù Èndè, Yèyè ùvwa pèndè mupàle. Bwalu, bàakamba ne: “Wèwè udi mwena Sàmaalèyà. Lungènyi ndukujìmine. Udi mupàle,” mu ngaakwilù mukwàbò ne: “muntu mubùlùke.” Yèyè ùvwa cyòci aci, kùdi bantu, Mukalenge wenù ne Musùngidi awu.

Kabyèna bikèmesha to, Pòlò, mulongesha kùdi Gàmaalièlè bwà kwikala mwakwidi, mwikale ne mpùngà wa dīngà ditùkù kulwayè mwakwidi munène. Kàdi mu njila wèndè mutàngile

ku Damàsèkè, wàkakùmiibwa panshi kùdi Bukênkè butàmbe-
mfùkulu. Ki kutàngilayè muulu, mwikàle mwena Yuda, ne
mumanye ne Dikunji dyà Kapyà ke dyàkalombolà cisàmbà
cyèndè aci. È kwambayè ne: “Mukalenge, Wèwè udi Nganyi?”

Ki kwambaYè ne: “Mémè ndi Yesù.”

⁵⁵ Nènku pàakalekelàye dilonga dyèndè, kulekela tèòlòji wèndè
uvwayè mulongèshìibwe mu bilongelu, ne kushààlaye muyiishi,
wetù wa pàtupù wa mu misèèsù ewu, ùvwa mupàle. Wàkamba
ne: “Ndi mulwè mukùtàkàne.”

⁵⁶ Nènku bantu bàvwa bèèla meeji ne ùvwa mutombòke,
lungènyi lumujimine. Wàkambila Festus ne: “Ncyèna
mutombòke to.” Ùvwa ànu mumanye Mukalenge. Kàdi kumanya
Mukalenge mu cisumbù cyà ntèndeleeleu. . .

Ndi ntèkemena ne kanwèna nucipangila to. Kumanya Yesù,
ditùkù edi, munkacì mwà cisumbù cyà ntèndeleeleu, wèwè udi
mupàle. Ki mbishintùlùke to. Ndi mufwànyine kusòmbela bikolè
pa bwalu ebu, kàdi ndi—ndi muswè kulwijakaja bwà mulongo wà
babèèdi.

⁵⁷ Martin Luther, nsaserdòsè mukesè wa cyena Allemagne
awu, uvwa mwambùle nkòmonyò dîngà ditùkù, kumwelayè pa
byendedi, ne kwambayè ne: “Eci kî mmmubidi wà Yesù Kilistò
to. Eci cidi ànu dyàmpà divwà dyenjìibwe kuntu kwàka.” Ki
yèyè kwamba patòòkè, ne: “Mwakàne neikalè ne mwoyi ku
diitabuuja.” Ùvwa mupàle, kùdi èkèleeziyà wa Kàtòlikè. Bàvwa
mwà kwikala bamushebèye bwà cyòci aci, kàdi, ùvwa mupàle,
nènku ki kumulekelabò tàlàlàà cyanààna. Kàdi, yèyè wàkalwa
mupàle, kùdi lukòngò alu.

⁵⁸ John Wesley, mu matùkù à cikondo cyà masandi cyà
Angleterre. Cikondo aci, bu ditàbuluja dyà Wesley kadiyi
dibwèlè mu cyalu. . . Buloba bujimà bùvwa bwonòke, masandi
myaba yònsò. Ne èkèleeziyà wa ba-Anglicans ùkaavwa muyè
ntàntà mu mùshindù wà ne kakùcivwa kàbidi ditàbuluja to;
ngeelèlù wa meeji wa ba-Calvinistes! Nènku John Wesley
kubwelayè mu cyalu, ne—ne Diyì dyà dijidiibwa, dikezula dyà
nsòmbelu wa masandi. Wàkalwa mupàle.

⁵⁹ Musangu kampànda, mvwa ntèèla Mukalenge Wesley, mu
mukàndà wèndè. Ùvwa wènda ùpweka ne kajila, ne muntu
kampànda wa mu èkèleeziyà wa mu Angleterre. . . Bàvwa bònsò
bèèla meeji ne ùvwa mupàle, ki kwimanayè mu kajila aku.
Mukalenge Wesley ùvwa muntu mukesè menemene. Muntu
ewu munène wa katanku ùvwa wèla meeji ne ùvwa ànu mwà
kumubyànkula panshi, pa nànkù ki kwimanayè mu kajila amu.
Mukalenge Wesley kuseemena e kwambayè ne: “Mfwilaanyikù
luse, mukalenge, udikù mwà kuumuka mu njila kakesè anyi?
Mémè ndi mu dilwijakaja.”

Ki Anglican awu kumwambilayè ne: “Mémè ncyèna
nguumuka mu njila bwà mukùtàkane to.”

⁶⁰ Ki Mukalenge Wesley kwinyikayè cifulu cyèndè, kumuseesukayè; wàmba ne: “Mémè ke cintù ngenza misangu yònsò.” Pa nàнку, nudi numòna’s, awu ùvwa mupâle; umwe ùvwa mbwà Kilistò; mukwabò ùvwa bwà èkèleeziyà.

Pa nàнку, wêwè udi mupâle wa muntu kampànda, nànsha nàнку.

⁶¹ Pààkabwelà beena Mpenta mu cyalu, kùkaadi bidimu makumi àtaanu, bààkamba ne: “Bantu abu mbapâle!” Bàvwa bapâle, ncyà bushùwà, bwalu bàvwa bàpiisha dibola dyònsò divwà mu bikondo byà èkèleeziyà mu cikondo cyàkabwelàbu mu cyalu aci.

Kàdi ncinyi cidi beena Mpenta bènzè? Bàkaalukila buludi mu bilùshi mùvwàbo bapàtùke, buludi mu dibola dyà cyena màngumba. Nudi bamanyè anyi? Diba dyàkùmbanyi bwà mupâle mukwabò. Èyowà. Dìbà dyàkùmbanyi bwà mukwabò. Ncyà bushùwà.

⁶² Mònaayi, mupâle, kumpàla kwà kwikalakù bùlu, kùdi ne cyà kwikala mulonda ùdi ne cyà kukùmbànangana ne bùlu abu. Ne bwòbò bùlu abu mbupungila ku mulonda awu; cyanààna, kabwèna bukùmbana to. Mònaayi. Bònsò bàvwa bapunga, mu matùkù à—à Noà, bapunga ku mukenji wà Èvànjeeliyò; Noà, bùlu abu, wàkabàpulumwina mu bwàtù. Mbilààle ku cidi yèbè nsàlu, cyùdi mupungila ku cyòci. Pawikale wêwè mupungila ku maalu à pa buloba, neàkupulùmùne. Pawikalà mupungila ku Dìyi, Dyòdi nedikupulùmùne. Mbilààle ku cyùdi mupungila ku cyòci, mbùlu kaayi buwàlonda.

⁶³ Kàdi Noà, bu mùvwàye mupâle ne Dìyi dyà Nzambì, mupâle ku cikondo cyà maalu à mamanya ne kùdi cikondo cyà ntèndeleeleu civwàye ne mwoyi mu cyòci aci, wàkapulumuna aba, bàvwa baswè kusungidiibwa abu, mu bwàtù. Amen. Bàvwa badyànjila kulongolola abu, mulonda ùkaavwà mwenza kumpàla kwà bùlu. Mulonda ùdi ne cyà kwikala mupungila ku bùlu.

⁶⁴ Pa nàнку, Sataàna, ùdi ne milonda kampànda ne màlu, kàbìdi, milonda ne màlu byà makalenge à buloba ebu.

Pâlò ùvwa ànu mupâle bwà Noà, anyi kùdi Mòsà, ànu mùvwà Mòsà mupâle kùdi Pâlò amu. Pâlò, ne màyele èndè wònsò à maalu à mamanya awu, ùvwa mupulùmùne cisàmbà cyèndè kùdiye. Noà, mu diikala dyèndè dyà mupâle bwà Nzambì, wàkapulumuna èkèleeziyà mu buloba bulaya. Mbilààle ku mùshindù ùdi mupungìbwe. Wàkapulumuna èkèleeziyà kumupàtula pambèlù pà Ejiipitù; ànu mwàkapulumunà Noà èkèleeziyà kumupàtula mu maalu à pa buloba, kumubweja mu bwàtù. Mòsà wàkapulumuna èkèleeziyà kumupàtula mu Èjiipitù, kuya nèndè mu buloba bulaya bwà Nzambì.

⁶⁵ Ki mwàkambà Yesù. Mpindyewu, tàbalàayi, bwalu màlu ne milonda eyi byònsò mbifwànangane. Tàngilàayi nwènu

ànu mpungilù. Maatàayi 24.24, Wākamba ne: “Ncifwànyine kuseeswisha Basungula mene.”

Mpindyewu, beena—beena Àmèrikè ne bàà pa buloba bujimà bàdi dijinga ne mupàle.

⁶⁶ Ba-Méthodistes, ba-Baptistes, Ba-Présbyteriens, mbatangàlake bônso mu *cikampànda*, *cikansanga*, ne munkaci mwà kulwishangana bônso. Nènkù, ndekeelu wa byónso, mbapungila bônso ànu ku mulonda ùmwèùmwe awu. Pa nànkù Nzambi mmubàpèeshe mulonda kampànda, ne kubàtùmina bùlu, Nsangilu wa Maèkèleeziyà à Buloba bujimà. Neàbàpulùmùne bônso pàmwè. Mmwômò. Nebiikalè nànkù bushùwà. Neàbàpulùmùne pàmwè, Nsangilu wa Buloba bujimà.

⁶⁷ Nudi bamanyè's, mbyenzèke, àbìdi mashààle aa . . . Kakwèna mwà kwenzeka cintu nànsha cimwè, bwalu, kakùyì kabingilà to. Bakàji mbaswè kuvùùla bilàmbà byàbò. Bàvwa baswè kuvwàla tùpùtulu. Mbaswè ànu kwikala bàà mu èkèleeziyà. Bàvwa baswè kuvwàla bikini byónso ebi, ànyi mwónso munùdi nubìbùkila biinè bintu abi. Mbaswè kwenza nànkù, cikòlà bàdi ànu baswè kwikala bàà mu èkèleeziyà; mbaswè kwela mbilà mikolè, kwela mikunda, ne kuja maja; kukuukwila, ki dikuukwila ndyòdi adi.

⁶⁸ Mpindyewu, bu ne mvwa ne dîbà, mvwa mufwànyine kunùjaadikilaci. Aci's ndikuukwila dyà dyabùlù, kuja maja mùshindù awu ne kwenza bintu abi. Ndi mwà kunùjaadikilaci, mu matungà à bampàngaanù. Bàvwa baswè kukuukwila, ne kulama bujaadiki bwàbò ne kushààla ànu mu èkèleeziyà. Ki Nzambi kubàpèeshayè mupàle, bàbìdi ànyi bàsàtù bajimà; umwe dîna dyèndè Elvis Presley; umwe, Pat Boone, ne Ernie Ford; bàdi mwà kwimba miyengà ne bintu bikwàbò byónso, cikòlà bàdyamba ànu mùdìbo beena Kilistò. Mmupàle. Kí mupungila pa Dìyì to. Mmwômò.

Mpindyewu, ngámì ne ndi njikija mu cyà bìbìdi cyà dîbà, nyewu cyàpici. Kàdi tèèlejàayi.

⁶⁹ Buloba bùdi dijinga ne bùlu. Dyabùlù ùdi ùtábaleela bwà ne bùbùpeta. Bàkaadi bamane kupungiibwa bwà bóbù abu.

Kàdi, pàdi bà pa buloba munkaci mwà kupungiibwa bwà bùlu, kùdi bantu bàbìkidiibwa ne Mukàji-musèla. Mmupungiibwe, pèndè. Ànu bu mùndi mwimàne mwab'ewu emu, Nzambi neàbàtùmine mupàle wíkala mwà kupàtula Mukàji-musèla mu cimvundù cinène eci, mu Bwikadi bwà Nzambi. Neciikalè mupàle mupungilà pa Dìyì.

⁷⁰ Mudyudi kampànda, matùkù mashààle aa, kungambilaye, mu Tucson mwàmwa. Yèyè ne: “Udi mumanyè's, bàmwè bantu bàdi bàkuvwija mupàle, ne bakwàbò bàkwenza nzambi.”

Mémè kwamba ne : “Èè, byà nànkù awu bìdi ànu bimpè.” Mvwa mumanyè ne ùvwa ùteeta bwà kundyula. Nwamònu ànyi?

⁷¹ Yèyè ne: “Bantu bàdi bèèla meeji ne wèwè udi nzambi.”

⁷² Mémè kwamba ne: “Èè, ànu...” Ndi mumanyè ne bantu kabàvwa bènza nàнку to. Kàdi mémè—mémè mvwa mumanyè ne yèyè kàvwa ùcyùmvwa to, bwalu ùvwa ku luseke lukwàbò lwà cisèba, nudi numòna’s. Pa nàнку mvwa mumanyè ne kàvwa, kàvwa mucimanyè to. Pa nàнку mémè kwamba ne: “Aci kacýèna kule menemene ne Dìyì dyà Nzambi to. Kí mmwòmò anyì?”

Nwamònu’s, ànu bwà ku—ànu bwà kumumanyisha ne katùvwa bajimine to. Tudi bamanyè mwaba utùvwa biimànyine. Tudi bamanyè citùdì beeyèmene, ne bukolè bùdì bùcyèndesha. Tudi bamanyè cívwa wetù mpungìlù, ne cívwa bwètù bùlu. Nènku tudi bamanyè mutùdì biimàne.

Mémè kwamba ne: “Aci kí ncibèngàngàne ne Dìyì dyà Nzambi, menemene to. Kí mmwòmò anyì?” Mémè kwamba ne: “Vùlukàayi ne, pàvwa Nzambi ùtùma Mòsà kùdì bàna bàa Izalèlèlè, Nzambi ùvwa muvwije Mòsà nzambi, ncyà bushùwà; ne muvwije, kabìdì, Aalònà mwanààbò, mupròfeta. Ncyà bushùwà. ‘Bapròfeta bònsò,’ Yesù wàkamba ne: ‘bàvwa banzambi.’ Bàvwa banzambi; balùme.” Ncyà bushùwà. Nzambi ùdì ùcyùmvwija mùshindù awu.

⁷³ Tèelejàayi, Dìyì ditùdì tuyiisha ne dìyì dímvwà mwambe mu dindà emu, “Nzambi ùsokoma paanyimà pàa bisèbà, bisèbà byà tusengelanshimbà, Nzambi ùsokoma paanyimà pàa cisèbà cyà muntu.” Nwamònu anyì? Kí cyàkenzàYe ncyòci aci. Pàkamwènèshiibwà Nzambi pa buloba, ùvwa musokòme paanyimà pàa cibwikilu, paanyimà pàa cisèbà cyà Muntu ùbìikidiibwa ne Yesù. Ùvwa mubwikila ne musokòme paanyimà pàa cisèbà cyà muntu ùbìikidiibwa ne Mòsà, ne bòbò bàvwa banzambi, kí mbaNzambi nànsha; kàdi bòbò bàvwa Nzambi, Nzambi umwèpelè, mwikàle ànu ùshintulula cibwikilu Cyèndè cyà kwìsù, wènza cintu cimwècimwè aci musangu wònsò, ùtwàla Dìyì edi. Nwamònu’s, Nzambi ngudi mucyènzè mùshindù awu. Yèyè mmumanyè ne bikèngela bwà muntu àmonè cintu kampànda; kùdì munda mwà yònsò wa kutùdì udi mulediibwe pa buloba.

⁷⁴ Ànu bu múmvwà nzwambila mu dindà emu, kakùvwa muntu nànsha umwe uvwa mwà kudìdinga bwà kulonda Mòsà muntwamu nànsha. Nzambi kacya katukù mukwàte mudimu ne bantu bàbìdì nànsha. Ùtu ùkwàta mudimu ne muntu umwèpelè, misangu yònsò. Kakùvwa muntu nànsha umwe ùvwa mwà kudìdinga kutentula Mòsà nànsha. Cívwa ndufù, lufù lwà mubidi, bwà kuteeta kumutentula, bwà kubwela nendè mu Dikunji dyà Kapyà adi. Pa nàнку bantu kí mbenza bònsò... Kwènà mulediibwe mu mùshindù awu, bwà kubwela mu citàmbe-mfùkulu aci nànsha.

Kàdi Nzambi mmutèèke pa buloba apa bàmwè bàdi mwà kuMuleeja mpàla, bu mùlòpò wà kùdìYe. Nènku mwinè mùlòpò awu mmulogolola, kùdì Nzambi, bwà kubwela mu citàmbe-

mfùkilu cinène cìdì kaciyì cimanyike aci, ne kujingulula, ne kujandula bintu bidì meeji à mubidi kaàyi mwà kuumvwa to. Cidi cisokolola bwalu busokoka bwà Nzambi, cìdyànjila kwamba bintu bidìku, ne bintu byàkadìku, ne bintu biikalàku. Ncinyi aci? Nzambi, Nzambi paanyimà pàà bisèbà, cisèbà cyà buntu. Ncyà bushùwà menemene.

⁷⁵ Sam Connelly mmusòmbèle mu Tucson. Wàkalwa musangu kampànda mwab'ewu, kùkaadi bidimu byàbùngì, ne Mukalenge Kidd, ne ùvwa mwondòpìibwe; ne cyùjà cilùndàmàne cyà bidimu byàbùngì. Pàmvwà mupàtùke mu movù mushààle wà mabèji àpòòpoka, Sam wàkadi ne—dibwa òvwà ngàngàbukà mupilùke wa kuntwaku, mu—mu Tucson, mwênze diteeta. Dìvwa dinène ànu bu dìibi. Mwanèètù Sam Connelly . . . Bààbùngì bàà munkaci mwènù emu mbamumanyè; yèyè ngwa ku Ohio. Ki kuyayè kùdì ngàngàbukà, kwambayè ne: “Sam, dilongòlòle lumingu lùdì lùlonda elu; nènkuumushe dibwa adi,” matùkù àbìdì kuumukila ku dîbà adi.

Kwambayè ne: “Dibwa edi didi mwà kunguumukila ku bunyawù anyi ngàngàbukà?”

Yèyè ne: “Kabyèna mwà kwenzekakù to. Dipondo didi ditàmbe bunène.”

⁷⁶ Ki kumwelayè mu kàshinyi e kwalukilayè nendè pambèlu. Ki kubiikilayè; kwambayè ne: “Ndi muswè bwà wèwè kulwa kunsambidila, Mwanèètù Branham.” Bwà cinyi wàkambiikila bwà cintu cyà mùshindù ewu? Ki mèmè kudìtwa mu dimusambidila.

⁷⁷ Mèmè kwamba ne: “Sam, ng'EMU MÙDÌ MUKALENGE WÀMBA, dibwa adi nedìdyumùkile.”

⁷⁸ Nènku mu dindà dyàkalondà wàkaya ne dibwa adi kùdì ngàngàbukà. Ki yèyè kwamba ne, ngàngàbukà kwambayè ne: “Mukalenge Connelly, ncyènà ngùmvwa mùdìbi byenzèke to.”

⁷⁹ Ke yèyè ne: “Mèmè ndi mwitabuuje Nzambi, nènku Nzambi mmuumùshe dibwa edi bwànyì mèmè, mmudyumùshe kùndì.” Ki kukolelabi muntu awu bwà kuciitabuujà, ngàngàbukà awu. Ànu mùvwàye kàbìdì kàyi mwà kwitabuujà bwà ne cyùjà cinène aci cìvwa cyumùke ku luseke lwà mukàjàànyì. Nudi bamanyè bwinè bwalu abu, nudi numònà's. Ki kwambayè ne . . .

⁸⁰ Paanyimà pàà ngondo mitwè bu ku yìsambòmbò, cìvwa nkùkaadi pabwìpi ne mbingu mitwè ku yìsàtù . . . pabwìpi ne mbingu mitwè ku yìbìdì nàнку, anyi mbingu yìsàtù, Sam Connelly ùvwa mutuuta panshì kùdì dìsaamà dikolè dyà mwoyi. Kàdi ncyènà mumanyà dìnà dyàdì to, ditàcisha dyà mijilu yà mwoyi, anyi dìsaamà kampànda dyà mwoyi, anyi ní ncinyi cìdici aci. Ncyà njiwù yàbùngì menemene . . . Kacyàdya . . . Kwènà mwà kupàtukamù to, mùtùbo bàmba. Dìsaamà dyà mwoyi, ne mwoyi wèndè ùvwa mupàte. Nènku bibelu byèndè bivwa byùle mu mùshindù wà ne tupòmbù twèndè tùvwa tudyunde tupite ne

mikòlò yèndè bunène, too ne lwà mu cimònu emu. Ki kuyabò nendè kùdì ngàngàbukà. Ngàngàbukà kwambayè ne: “Ndaayi nendè kumbèlu, mu ditalala, anyi ku lùpitaadi.”

Sam kwambayè ne: “Ncyèna muswè kuya ku lùpitaadi to!”

Yèyè ne: “Ndaayi nendè kumbèlu nùkamutèèke mu bulààlu, ne kanyungushikù mutù, cyanza, anyi dikàsà, munda mwà ngondo yisambòmbò to.” Kwambayè ne: “Udi mwà kufwà pa kasunsa kanà kwònsò.”

⁸¹ Ki Mwanèètù Norman kubiikilayè. Ki twètù kuyakù bufùkù abu, bwà kumòna Mwanèètù Sam. Nènku patwàkamusambidilà, ki Mukalenge kwakula.

Nènku pàakacyàbo mu dindà, Sam kupwekayè mu bìrò byà ngàngàbukà, ne mikòlò yèndè yà mùpanu ayi mibàndisha, e kwimanayè kumpàlà kwà ngàngàbukà, kwambayè ne: “Ntàngilaaku tǔng, ngàngàbukà!”

Ki ngàngàbukà kumwasayè ku cyamù cidì citeeta mwoyi, e kwambayè ne: “Ncyèna ncyùmva to.” Yèyè ne: “Alùkilà ku mudimu.” Yèyè ne: “Udi wa mu èkèleeziyà kaayi?”

Yèyè ne: “Ncyèna nànsha wa umwe wa ku yòyi nànsha.”

⁸² Yèyè ne “Kwèna mwà kwikala mwena Kilistò kùyì wa mu màngumba awu to. Udi ne cyà kwikalamu.” Nwamònu’s, ki cyònsò cìvwà ngàngàbukà mumanyè aci. Sam ùvwa mupàle, kùdiye. Nènku yèyè ùvwa mupàle, kùdì Sam, pa kumwela lukonko lwà mùshindù awu.

Pashiishe cyàkenzekà ncinyi? Sam kulwaye, kwambaye ne: “Cìndì mwà kwambila muntu udi ungambila bintu byà mùshindù awu ncinyi, Mwanèètù Branham?”

⁸³ “Baambile ne wèwè ‘udi wa mu Èkèleeziyà umwe ne umwèpelè awu.’ Kwèna ukashààla wa mwòmù amu to. Ki ndingumba to. Udi muledibweMù.”

⁸⁴ Inàbànzà mutekète, kùkaadi bu ngondo yisambòmbò nànkù, mweyèmène pa cyàdì cyà Mwanèètù wa bakàjì Norman. Ngápù dìnà dyèndè mwoyi, mukàjì mulenga mutekète wa bidimu bitwè ku makumi àsàtù. Yèyè ne bàyèndè bàvwa batàpùlùke, ke mukàjì awu kupetayè disaamà dyà kànsère kàà mu mashi. Nènku ùkaavwa mu ngiikàdìlù awu mu mùshindù wà ne kàvwa mwà kunyungulukakù to. Nènku ndekeelu wa byònsò byàkatàmba kubiipa mu mùshindù wà ne bangàngàbukà bààkamutèèka mu bulààlu. Nènku bangàngàbukà bàvwa bàmusàmba too ne mùwà cikondo mwà kukumbana. Bàkamupèèsha too ne diisàtù divwà dilonda. Ùvwa mufwànyine kufwà pa kwamba tùtwe mu diisàtù. Ki Màndamù Norman nànsha nànkù kumupàtula mu bulààlu, kulwayè nendè, ne ùvwa ne cyà kumulamina mu nkwasà. Nènku pàvwà kawàcikwètù kasòmbe muntwamu, kiinyija mutù kumpàlà kààwinyija paanyimà, mvya búngiyi ku mutù; mpàla

wènda ùshààla wa kàlaabi, byumùkile ku kànsèrè, kànsèrè kàà mu mashi.

Mémè kwamba ne: “Èè, ndi mwà kukusambidila, mwanèètù wa bakàji.”

Nènku yèyè ùvwa munkaci mwà kuteeta kwakula, ne binsonji mu mèsù, e kwambayè ne. . .

Mémè—mémè kwamba ne: “Wèwè udi mwena Kilistò anyi?”

Yèyè ne: “Mémè ndi Méthodiste.”

Mémè kwamba ne: “Ndi—ndi mukukonke ní uvwa mwena Kilistò.”

Ki yèyè ne: “Udi uswa kwamba ne udi wa mu èkèleeziyà wa beena Kilistò anyi?”

⁸⁵ Mémè ne: “To, mandamu. Ndi muswè kwamba ne, udi mulediibwe kùdi Nyumà wa Nzambì, ne munange Mukalenge Yesù anyi?”

Yèyè ne: “Èè, mémè ntu misangu yònsò ànu wa mu èkèleeziyà.”

⁸⁶ Mémè kwamba ne: “Bu Nzambì mwà kukushìya ne mwoyi, udi undaya ne newàlukilè kùndi ne kwitaba bwà mémè kukuleeja njila wa Mukalenge mu mùshindù wà mutàmbe kutòoka anyi?”

Yèyè ne: “Ndi ndaya Nzambì cintu kanà cyònsò, bu Yèyè mwà kulama mwoyi wànyi. NèmMukwàcìlè mudimu.”

⁸⁷ Ànu piinè apu cikèènà—kumòna kulwaci, kwamba ne: “EMU MMÜDÌ MUKALENGE WÀMBA. Kùdilonglodi to; sùnsulula mikanda yèbè yà ne udi ufwà ayi, dyàbwàbwa.” Tuvwa mu dimwè, ne yèyè ùvwa ne cyà kufwà mu diisâtù. “Wèwè kwèna ùfwà to.”

Mu dyàlumingu dishààle edi, lumingu lujimà kuumukila ànu ku dyàlumingu adi, mvwa musòmbe nendè mu cibambalu amu. Ùkaavwa mupetè ndambù wa kilô mitwè ku dikumi ne yitàanu; ngàngàbukà kwamba ne kakwèna kashoonyi kàà kànsèrè kàà mu mashi kàvwà kasanganyibwa mwaba nànsha ùmwè to. Nènku mukàji awu ùvwa muswè kumanya; ki mémè kumutùma bwà kabàtijiibwayè mu Dìnà dyà Yesù Kilistò, mu mùkidi wà mâyi, njila wa Mukalenge. Mmufwànyine kwikala mupàle, kàdi, “Pangààbàndishiibwà, Nènkoke bantu bònsò kùNdi.”

⁸⁸ Mvwa mukasàmbe, kwà nsongààlùmè uvwa ne ciibidilu cyà kulwa kukwàta mikàbà yà mèyi mwab’ewu, Leo Mercier. Udi ne mwaba wà nzùbu yà kutentemuna. Nènku mvwa munkaci mwà kusambidila bantu kampànda. Ne mémè kusambidila inábànzà mutekète dìnà dyèndè Lokar, ngèèla meeji ùvwa nyèyè. Nènku bàvwa bamupàndè kànsèrè misangu dikumi ne yìnaayi, ne bangàngàbukà kumwelabò làà bwà kufwàye. Nènku mvwa mumusambidile, ne mumwambile ne kààkufwà to, kàdi ùvwa ne

cyà kwikala ne mwoyi. Kàdi kakwèna nànsha kashoonyi kààku nànsha mwaba ùmwè to. Nènku bwà bwóbò bwalu abu, bantu makumi àbìdì ne mwanda mukùlù bàà mu dîku dyèndè bàvwa biimàne mwaba awu, basùngìdìibwe ne bùlè tètè ne Nyumà Mwimpè. Mmufwànyine kwikala mupàle, kàdi munkaci mwà kukòka bantu bònsò kùdìYe, bààswà kulwa abu. Mmupungila pa Dîyi. Nudi bamòne cìndì muswè kwamba anyi?

⁸⁹ Mvwa mupete mukàndà muntùmina, dyàbwàbwa, mutèèka ànu paanyimà pààpa mu cilaminyi cyà mikàndà. Muvù wà bintu bipòòpoka mushààle, pàmvwà mu lwendu lwà bulembi. . . anyi, mu movù wà bintu bitòloka mushààle, mùvwa mmu cidimu cishààle. Nsongààlùmè kampànda wa beena Inde dîna dyèndè Oscar, utùvwa bakalembe nendè lwà ku cibeeba kwàka; nkwòkò kùvwà Mwanjèlò wa Mukalenge, ùmvwà munwambile, lwà mwab'ewu, ùvwa mwà kutwàla nyama wa kashà kanène kàà nsèngù yà mpàndà awu ne—ne ours munène mufikùlùke awu. Nwènu bònsò nudi bavùlùke cyòcì eci. Pashìishe nsongààlùmè awu, dîbà dingààkabwelà mu. . . Wàkabwela mu ntentà, mu movù wà bintu bitòloka mushààle awu. Nènku pààkandòmbà Bud bwà kulòmba dibènesha, (yéyè wàkuumusha gants yèndè ku byanza; ùvwa munkaci mwà kwendesha màshinyì), wàkalwàta gants ayi ne wàkadilongolola bwà kupàtuka. Ùvwa mwena Kàtòlikè. Kàvwa naaCì bwalu to.

⁹⁰ Mu movù wà bintu bipòòpoka mushààle, pàpetèlaye mpùngà, ùvwa mwimàne ku luseke lwànyì. . . Pàvwà mamwèndè mushààle muntwamu, mwikàle ùpùnga ne lufù ne disaamà dyà mwoyi, yéyè kwamba ne: “Kwènàku mwà kwalukila bwà kumusambidila anyi?” Mémè kwalukila mu kaamutàndà kakesè kàà ba-Indians aku. Nènku kwòkò aku, bònsò bwàbò kudikùngwijabò banyùngùlùkile maamù ewu, wa bwalu ùpùnga ne lufù, kàyikù mwà kwakula mwàkù wà Anglais nànsha ùmwè to. Ki Nyumà Mwimpè kupweka e kwambila maamù awu, kupìcila ku mukùdimunyi, mwanèndè wa bakàjì, cìvwà cyenzèke, cìvwà bwalu. Kutèela too ne dîna dyèndè, kumwambila cìvwàye, ne cifuku cìvwàye mupàtùkile, ne mùshindù ùvwà eci cifwànyine kwenzeka. Ki maamù awu kwondopiibwayè pa cibànza.

⁹¹ Dindà dyàkalonda pangàkalukila bwa kubatangila, pàmvwa mpàtuka pa kabalu, nya mu ntàntà wa kilòmeèta makùmi asambòmbò ne yinaayi bwà kapeta mùkooko, ki bòbò abu basòmbe bònsò mwaba awu, ùvwa katakata. . . ùbànda pa kabalù bwà kuya kaanyika munyìinyi wà mbowà. Ki mémè kwamba ne: “Makèèlèlè dilòlò pàmvwà musambile, mémè kwamba ne: “Taatu Wetu Udi mu Dyulu.” Mémè kwamba ne: “Louise, ndi—ndi. . . Cìvwa disambila dyà cyena Kàtòlikè. Nuvwa babàngè bònsò, ne pashìishe, mu bushùwà bwà bwalu, mvwa munùshiye.” Ki mémè kwamba ne: “Mpindyewu nèngùikalè ànu mwà kwela Nzambi twasàkidila. Katwèna

twambulula masambila to; tudi tusambila.”

⁹² Yèyè ne: “Twètù katwèna kàbìdì beena Kàtòlikè to.” Yèyè ne: “Tudi twitabuuja mùdì wèwè witabuuja amu. Tudi baswè bwà wèwè kutwangata twètù bònsò ne kutùbàtiiza mùshindù wùdì ubàtiiza awu. Tudi baswè Nyumà Mwîmpè.”

⁹³ Mu dyalukila... Nsongààlùmè awu ùvwa mujìmije tubalù twèndè, ngondo kumpàlà kwà cyòcì aci, kàyikù mwà kutùpeta to. Nènku mulombodì ùvwa ùmutàndisha, wàmba ne: “Oscar, wèwè’s uvwa mumanyè bîmpè kutàmba bwà wèwè kushiya tubalù atu mùshindù awu. Ours, yàbùngì yà mifìkùlùke, yìvwa mifwànyìne kwikala mimane kudyà tubalù atu patùdì twakula apa.”

Ki kushààlayè kacya wàndamata. E kwambaye, dilòlò kampànda, kwambayè ne: “Mémè nkulòmbakù cintu kampànda anyi?”

Mémè kwamba ne “Èyowà.”

Kwambaye ne: “Mwanèètù Branham, lòmbakù Nzambi. Nzambi àngaalùjìle tubalù twànyì.”

Mémè kwamba ne: “Bud wàmbi ne ours mmitùdyè.”

Yèyè kwamba ne: “Mwanèètù Branham, lòmba Nzambi. Nzambi alùjìlà Oscar tubalù twèndè.”

Ki mémè kwamba ne: “Udi witabuuja aci anyi, Oscar?”

Yèyè kwamba ne: “Ndi ngìtabuuja. Nzambi mmwondàpe mamwànyì. Nzambi mmukwambila mwaba ùvwà ours, mwaba ùvwà nyama. Nzambi awu, uvwa mumanye mwaba ùvwà nyama awu, mmumanye mwaba ùdì tubalù twànyì.” Nwamònu anyi?

⁹⁴ Kùkaadi cidimu, pàmvwà mwimàne paanyimà pààpa ne Fred Sothmann, udi kaaba aka dilòlò edì awu, ne Billy Paul, mwanàanyì wa balùme. Nyumà Mwîmpè kupwekayè. Mémè kwamba ne: “Oscar, neùpetè tubalù twèbè. Netwikale twimàne mu nêjè.”

Ki mukàndà ùdì pààpa wàwa, mumfùdila lumingu lushààle elu, nènku ndi muwùpetè mu diitànù, mu dibwela mwab’ewu. Udi ùsanganyìbwa mu cibùcìlu cyànyì cyà mikàndà mwàmwa mpindyewu. “Mwanèètù Branham, Oscar mmupetè tubalù twimàne mu nêjè.”

⁹⁵ Mùshindù ùvwàtu ne mwoyi, muntu nànsha umwe kí mmumanyè to. Kwòkù aku, nsongààlùmè... Mu cikondo eci cyà cidimu, mu ngondo wa Kabàlànshipù, kùdì nêjè mwingyamwingyâlè kuntwaku too ne bule bwà mètres àsambòmbò anyì citèmà à nêjè mutùnyungùlùkile. Mmunyì mùvwàtu tushààla kuntwaku mu muvù wà mashika, mu lupòngò emu? Oscar ùdì mwà kubwela mwaba ùdìyi awu, muvwàle bisàbaatà byà nêjè, kàdì, mu bushùwà bwà bwalu, kènà mwà kuvwàdika tubalù twèndè bisàbaatà byà nêjè to. Kàdì

wàkatùsangana, bilondèshile Dîyi dyà Mukalenge. Cidi mwà kumvwika bu cyà bupâle; itàbùùjà ànu kuciitabuujà musangu ùmwè! Mbilààle ku mùshindù ùdi mpungilù yèbè.

⁹⁶ Mpindyewu, kacyàkupungakana ne dîngumba to. Necipungakanè ànu ne Dîyi. Kàdi kùdi bàmwè bantu pa buloba bàdi biitabuujà Dîyi adi! Nebiikèngelè mupâle bwà kujingila Mukàji-musèla awu kuumuka nendè pânwapa, mmupunga, bwalu Mubàki ne Mukàji musèla bàdi umwe. Ne Nzambi ùdi umwe, ne Dîyi n’Nzambi! Nebikèngelè kwikalaci cijingilàngane ne Dîyi, nènku Cyôci aci necipatulè Mukàji-musèla mu màngumba awu.

⁹⁷ Èyowà, yèyè ùvwa muswè kundyula. Nudi bamanyè’s, cidi cimvùlwija bwà pangàakùlù, mu dindà emu, bwà Nzambi ùdisokoka paanyimà pàà bisèba, cisèba cyà muntu.

⁹⁸ Bwalu-bulonda bukesè, pashiishe ndi ngòòya; ndi nnùlomba luse bwà dinùlama dîndi munùlamè mwab’ewu mu tusunsa tutwè ku makumi ànaayi ne tûtaanu mpindyewu. Kùdi dîkù, dîkù dyà mwena Kilistò, nènku kùvwa. . . Mèmè e kwambila mudyudyanganyi awu cintu eci. Nènku mu dîkù edi mùvwa. . . Bàvwa biitàbùùje Nzambi. Bàvwa ne mwànà mukesè wa balùme mwaba awu, kàdi ùvwa ne bwôwà bwà lufù mu cipeepèlè cikolè cyà mvùla. Mikenyi, kaa, ùvwa ànu ne bwôwà bwà lufù. Ùvwa mwà kunyemena mwinshi mwà mèsà, mwaba kanà wònsò, pàvwa mikenyi yà mvùla mwà kwela.

Nànku ki dilòlò kampànda kulwakù cipeepèlè cinène cikolè mu ferme amu, nènku mwaba ùvwàbo basòmbèlè, ne micì yìvwa yinyunga ne cipeepèlè, ne mikenyi yà mvùla yèla, bufùkù bumane kwila bikolè. Ki maamù kwambilayè Junior, wàmba ne: “Mpindyewu, Junior, bàndaaku ku nzùbu wa kuulu ùkalààle tulù.” Kwambayi ne: “Mpindyewu, kùmvu bwôwà to. Bànda kuulu kwàka.”

⁹⁹ Nànku ke Junior mwànà, ne pijàma wendè pambidi, kubàndayè mu bibàndilu, mutàngile paanyimà, wàmba kudila mwadi. Kulààlayè panshi, kuteetayè bwà kuya mu tulù, e kudibwikilayè ku mutù kwònsò. Kàvwakù mwà kuya mu tulù to; mukenyi wà mvùla awu ùvwa wèlèla pabwîpì ne ku dîdidiishi aku. Pa nànku kwambayè ne: “Kaa, maman,” mwàkambàye, “bànda kunweku bwà ùlaalè pàmwè naanyi.”

Èè, maman ne: “Junior, cintu nànsha cimwè kacyàkukutàcisha to. Mukenyi awu kawèna mwà kukwenzela bibi to.”

Yèyè ne: “Kàdi, maman, bànda kunweku bwà ùlaalè pàmwè naanyi.”

¹⁰⁰ Ke maamù kubàndayè kuulu pa bibàndilu ne kudyàdiye pa bulààlu, ne Junior wendè. Ki yèyè ne: “Junior, mwanàanyi mukesè wa balùme, maamù mmuswè kukwambila cintu kampànda.” Yèyè ne: “Junior, twètù tudi dîkù dyà beana Kilistò.

Tudi twitabuuja Nzambi, ne tudi twitabuuja ne Nzambi ùdi ùtùlama mu bipeepèlè bikolè. Tudi twitabuuja nàнку. Nèнку tudi twitabuuja ne Nzambi ùtu ùcyùka bèndè Yèyè mwinè.” Ki yèyè ne: “Ndi muswè bwà ùcìtabùùjè, Junior. Nàнку, lekèla bwòwà. Nzambi ùdi neetù, ne Yèyè neatùkùbè.”

¹⁰¹ Junior kushikunkilayè katanci kakesè. Kwambayè ne: “Maman, ndi ngiitabuuja cyòci aci, mèmè pàanyi.” Yèyè ne: “Kàdi dìbà didi mukenyi wà mvùla awu wèlela pabwipi ne ku dididiishì aku, ndi njinga kulenga Nzambi udi ne dikòbà pambidi Pèndè awu.”

Pa nàнку ndi ngèèla meeji ne bantu bààbùngì bàà kutùdi twètù bakùlumpè tudi tudyèlela meeji mùshindù ùmwèùmwè awu. Nzambi, ne dikòbà pambidi Pèndè! [Katùpà kàà mukàbà wà mèyi munda mutupù—Muf.] Nzambi, ne dikòbà pambidi Pèndè! Ncìfwànyine kumvwika bu bupàlè, kùdi bàà pa buloba, kàdi cidi cìkòka bantu bònsò kùdiYe.

Tùsambilàayi.

¹⁰² Taatù wa mu Dyulu, nànsa mùdi maalu-malonda makesè à—à malabula, ne mîngà misangu àdi ènzeka bwà kabingilà kampànda. Nèнку cidi, nànsa mùdici cyùmè emu, nànsa nàнку tudi tucyùmvwà mu mwakulu ùdici cyenzèkèle awu. Pa nàнку tudi tuKusàkidila, dilòlò edi, Mukalenge, bwà—bwà mùdi Nzambi mwà kusòmbela Yèyè mwine munda mwètù emu. Tudi ne kusàkidila bwà mwàkenzekàkù difilà dyà mulàmbù wà dijimija naawù mpèkaatù, Mashi à mwakàne Awu, Yesù; Yèyè uvwa kaabujimà kàà Nzambi, kaabujimà kàà Bunzambi mu ciikadilu cyà mubidi, mu mùshindù wà ne wàkatèeka mwoyi Wèndè wà musinga awu panshi; kawùyi muMunyènga to, kàdi ku budiswila bwèndè wàkawùtèeka panshi, bwà twamòna mwà kusànka Nèndè mu kaabujimà kàà Bwikadi Bwèndè, mu butùmbi bwà Shekinah bùvwàYe musòmbèlemù abu; bwà misùùkà yètù yàmòna mwà kwikala mijidiibwè ne Mashi awu, bwà Nyumà Mwimpè munène Yèyè mwinè awu wàmòna mwà kusòmbela munda mwètù. Nèнку tudi tulwa balongeshi, bapròfetà, ne bikwàbò, kùdi bantu abu, kùdi aba, Mukalenge, bàdi mu lukèngelu; mapà à Nzambi; Nzambi Yèyè mwine munkaci mwà kudimwènesha, wènda ùkenkesha mapà manène à Nzambi, kumpàlà kwà cikondo cyà cyena leelù eci.

¹⁰³ Ne cyakwidi cyùmè eci, Mukalenge, cyà kwikala mupàle. Nèнку tudi bamanyè ne, mu ditùkù edi, ne ke cidi misangu mikwàbò cìkèngediibwa pàdi buloba ebu bwènda budibwinka mu biibidilu ànu bìmwèbìmwè bu mùdi èkèleeziyà leelù ewu emu, bàkalamakana ànu ku maèkèleeziyà mapyamàpyà ne màngumba mapyamàpyà. Muntu udi upàtuka ne Dìyi ùdi ùbadiibwa bu mupàle, muntu mutombòke. Bu mùpostòlò munène Pòlò, uvwa mulongeshiibwe bwà kwikala mwena tèlòlji, mwakwidi, kàdi nànsa nàнку kwambayè ne yèyè wàkalwa

mupâle, bwà butùmbi bwà Nzambi. Wàkapwà mwoyi malonga èndè, bwà bantu bà mòna mwà...kutèeleja myàkù yèndè mitùmbùke mifinùnùke ayi. Nènku wàkamba ne kààkalwa ne mèyi à budimù anyi à lungènyi lwà muntu to, bwà diitabuuja dyàbò kwikaladi mu cyà mùshindù awu nànsha. Mùshindù ùdi èkèleeziyà mwalùkile ku cyòci aci leelù ewu, ànu mwàkacyàmbàye mu cipròfeta ne: “Paanyimà pàà diya dyànyi, mibwàbwà neyibwelè, kayiyi mwà kulaminyina cisumbù cyà mikòòkò nànsha.” Kàdi wàkamba ne wàkalwa kùdibo, “mu bukolè ne dileeja dyà patòoke dyà Nyumà Mwímpè,” bwà diitabuuja dyàbò kwikaladi mu Nzambi. Taatù, wàkalwa mupâle, kùdi bàà pa buloba, bwà kumanyabò Yesù.

¹⁰⁴ Nènku ke mutùdi twenza leelù ewu, Mukalenge. Kùdi bantu basòmbe mwab’ewu bàdibo bàbala bu batombòke, bwalu bwòbò mbadilongòlola bwà kweyemena Nzambi bwà dyondopiibwa dyàbò, bwà kwàbò kwà Cyendèlèlèlà kwàyàbo. Kutèeka luumù lwàbò panshi, bwà kuMukuukwila. Munkaci mwà kuMusàkidila, munkaci mwà kuMutùmbisha, bàfila budìikadidi kùdi nyumà wabò, bwà kukuukwila Nzambi; bàdi bàbadiibwa bu batombòke. Kàdi Wèwè wàkamba, ne: “Dikùtakana dyà Nzambi,” pìikalàbi ne tudi bakùtakàne, “dìvwa ditàmba kwikala ne bukolè ne ditàmba kwikala ne lungènyi kupita lungènyi lwà muntu; bwalu muntu, ku lungènyi, kàvwa mumanye Nzambi to. Kàdi ku dikùtakana dyà diyiisha, byàkasànkisha Nzambi bwà kusungila aba bàvwà mwà kusungidiibwa.” Tudi tulòmba, Nzambi, bwà Mwena Dìyi munène wàlwa dilòlò edi bwà kwondopa babèedi, kusungila bajimine. Tudi tulòmba nùnkù mu Dìnà dyà Yesù. Amen.

¹⁰⁵ Ndi mfwànyikija Nzambi, bwà ne kanwikadi mu cibwejàkàjì pa bìndi mwàmbe leelù ewu to; Nzambi ùdi Mbongò munène, wa Cyendèlèlèlè awu.

Nènku pàdi mbongò ùpàtudiibwa mu mabwe à bleu à mu Àfrikè, mvwa mu biinà byà mbóngò ne mubitàngile mu byà binène. . . mùshindù ùtùbo bènza byòbi ebi ne bàpàtulamu mbongò, mùshindù ùtùbo bàbìpicishila mu cizaaji cyà mabwe, ne mbongò minène yà mudilu wà bleu, mbongò mifiike yipàtuka. Kayivwa ne mbùngakeenu mukùmbàne to, mbùngakeenu kampànda. Yidi ànu dibwe dinène nàka. Nènku, mu bushùwà bwà bwalu, kayèna ne kapyà munda mwàyì pa dîbà adi to. Yidi ànu mbongò, dibwe kampànda; divungàmàne, difinùnùke pambidi apa, yàbùngi yà ku yòyi. Kàdi mbongò ewu ùdi ne cyà kusongiibwa. Mpindyewu, mbikàndikiibwe kùdi mikenji bwà kwikala naadi kadiyi disonga nànsha. Dìdi ne cyà kusongiibwa, ne pashiishe udi ne cyà kwikala ne reçu wa mwaba úvwà mudisumbile, bwalu didi diyiila mìliyò yà ndola.

Nènku ndi mfwànyikija Nzambi ne mbongò awu.

¹⁰⁶ Mpindyewu, mbongò ùdi ùsongiibwa bwà wàmòna mwà

kuleeja cidi munda mwèndè, kapyà kàdi munda mwà mbongò awu aku. Nènku didi ne cyà kusongiibwa mu mùshindù mukesè wònsò, mu mbùngakeenu mukesè yònsò, matumba àsàtù. Kwenza matumba àsàtù ku mbongò, ne bukènkè butàngija cintu cyà nsongo yisàtù nebùfilè meekala mwandamutekète, nwamònu's, bùdi bwènza meekala mwandamutekète.

¹⁰⁷ Nènku mpindyewu mònaayi ne: “Nzambì wàkatàpiibwa mpùtà bwà kushipa kwètù kwà mikenji, muzaajiibwe bwà bubì bwètù.” Nwamònu's, Yèyè wàkasongiibwa, kuzaajiibwa, Mbongò munène awu, bwà ne ku Yèyè wàmòna mwà kuleeja mapà kùdi Èkèleeziyà.

Nènku kî mbukènkè to; bwalu, bukènkè bùdi ne cyà kwalukila, pàdi dîbà dyumukapù, bwàlukila mwaba wàkasongiibwàbu.

Kàdi kapese kakesè kònsò kàdi kuumukila ku disùnsula adi kabèèna bàkàvingutula to; bàdi bènza naakù mudimu. Twàbùngì twà kù twòtù bàdi bènza naatù tushingì twà cisanji cyà tourne-disque. Nènku twòtù tushingì atu tùdi tùpàtula, tùvwà tusùnsulwila ku tupese twà mbongò atu, tùpàtula mwadi wà mijiki yìvwàbo bakwàte pa disque.

¹⁰⁸ Ne ndi ntèkemena ne nudi numòna cìndi njinga kwamba aci. Kapese kàdi kuumukila kùdi Kilistò, dipà dyà kùdi Kilistò adi, katenteka pa Bible, kàdi kàjikula patòoke maalu masokoka à Nzambì kùdi mwena kwitabuujà. Yèyè mmumanyè mùnsokòntù wa mwoyi. Yèyè mmumanyè muntu yònsò. Udi wìtabuuja nànkù anyi?

Kî mbongò udi mwà kwamba ne: “Nwàmònu cìndi anyi?” Nkùdiye mufùmìne. Mbongò ùdi mbongò bwalu ùdi ùfùmìna ku mbongò.

¹⁰⁹ Ki mùshindù ùdi mapà à Nyumà nànkù, kùdi...kùdi muntu awu, nciùpà cyà Mbongò awu. Mmutùmiibwe, ne wàkapwekeshiibwa, ne kubwejiibwa mu dipà, bwà kwandamana, bwà kuyiisha, bwà kulongesha. Kùdi mapà àtaanu à nyumà; bàpostòlò, baprófetà, balongeshi, bampaasàtà, batangadiki, ne bòbò bònsò bàdi bwà diibakiibwa dyà Mubidi wà Kilistò. Anu mùdiku bushùwà balongeshi, baampaasàtà, kùdi ne cyà kwikala baprófetà. Tudi bamanyè aci.

¹¹⁰ Nènku tudi twitabuujà ne Nzambì ùdi ne cyà kumwèneshiibwa mu ditùkù dyà ndekeelu, munkaci mwà bantu Bèndè, kùdi Dimiinu disungula, bilondèshile Bible, mu mmwènèkelu wa muprófetà. Aci's cidi cìnwàngana menemene ne Dìyì. Kî nne muntu awu n'Nzambì to, kàdi ndipà adi didi Nzambì. Nwamònu anyi? Nènku ki kashingì nkwokù aku.

Mpindyewu, mpengèla kèna mwà kwimbisha musambu awu bîmpè to. Kashingì keètù kàa ciibidilu kàtùbo bàtela naakù aka kakèèna mwà kucimbisha bîmpè to. Kàdi mbongò, ki

udi mutámbe bwímpè. Ûdi ùwùpátula mujikùke, kashìngì kàà mbongò kasongòlòke aku.

111 Nzambi àswekù, dilòlò edi . . . Bujaadiki bwèbè bwà mwoyi, cyònsò cidì cikutàcisha aci, cyònsò cyùdi ujinga kùdi Nzambi aci, Mulongeshi munène Udi mulamè kashìngì mu cyanza Cyèndè awu ànyishèku, ànyishèku Àkàtèèkèku pa mwoyi wèbè ne àtùsokòlwèlà cyùdi muvwilè kaaba aka, cyùdi ujinga; dîbà adi netùmanyè ne Yèyè ùdi mwab'ewu.

112 Taatù wa mu Dyulu, Wèwè cyenzeku kumpalà kwà mèmè kubanga mulongo wà babèedi ewu, nciyi ne kiipàcilà kàà kwenza cyòci eci to, kàdi Enzàku nàнку, bwà bantu bààmòna mwà kumanya. Kùdi mwà kwikala benyi mwab'ewu bwà kubàsambidilabò. Mèmè ncyènà mubàmanyè to, kàdi Wèwè udi mubàmanyè. Kàdi Pòlò wàkamba ne: “Wèwè wakula mu myakulu, ne kwòkò kakùyì dyandamuna anyì kabìyi bìfila diibakiibwa to, bantu nebàmbè ne udi mupàle. Kàdi muntu yèyè wàmba díyì dyà cipròfetà ne ùsokolola cidì mu mwoyi, dîbà adi nebàmbè ne: ‘Bulelèlà menemene Nzambi ùdi neenù.’” Swàkù bìikale kàbìdi nàнку, Nzambi, mu dîbà dyà ndekeelu edi. Wèwè ngwàkacilaya, nènku ki mwikalàbi. Mu Dîna dyà Yesù Kilistò. Amen.

113 Mpindyewu ndi ndikonka ne mbabèedi búngì kaayi bàdi mwab'ewu dilòlò edi, bàdi kaaba aka? Anyì Billy mmwabanye twà disambila . . . ? Kùdikù twarta twà disambila twabanya anyì? [Bànà bèètù bàdi bàmba ne: “Èyowà.”—Muf.] Tùdikù. Èè, ngèèla meejì ne mubèedi yònsò ùdi ne kartà kàà disambila, kàdi ncyèna mumanyè cyùdi mufùndepù to. Ndi ngèèla meejì ne yèyè ùdi ùnùpèèsha ànu kartà; wèwè ke udi ufùndàpu cyùdi ujinga. Ki cyòci aci anyì? Udi wèwè ànu ne kartà; udi ufùndapù cyònsò cyùdi ujinga aci.

114 Ncyèna mukumanyè to. Mbanganyi kaaba aka bàdi bamanyè ne ncyèna munùmanyè to, kàdi nànsha nàнку bìikàle nusaama, nènku nudi bafwànyine kwamba ne: “Cingàkúmvù wamba leelù ewu cyà ne: ‘Nzambi paanyimà pàà bisèba. Nzambi paanyimà pàà cisèba cyà buntu, muDìbwikile Yèyè mwìnè anyì?’” Kàdi wèwè mwikàle ne mèsù à nyumà, udi mwà kutàbala ne kuMumòna, kumòna ne Yèyè Nganyi. Ne wèwè kuciitabuuja. Yesù wàkamba ne: “Ewu udi ungiitabuuja Mèmè byenzedi bìNdì ngèenza yèyè neàbyènzè pèndè; neènzè kutàmbe ne ebi, bwalu Ndi nya ku Taatù.” Mpindyewu, wèwè witaabuuja ne mwoyi wèbè wònsò!

115 Mbanganyi bàdi bàsaama mwab'ewu, ne bamanyè ne ncyèna munùmanyè to, nciyi mumanyè lutàtu lùdi kunùdi to? Ela ànu cyanza muulu cyanààna, wamba ne: “Ndi nsaama. Ndi ne dijinga.” Mbanganyi bàdi ne majinga mu mwoyi wàbò, kabàyi bàsaama to, kàdi bìikàle ne majinga? Nudi bamanyè cìndi . . . Èyo. Kakwèna muntu nànsha umwe, ùndì mumòne

mwab'awu, udi kàyi mwelè cyanza muulu to. Mpindyewu, ncyèna mumanyè. . .

¹¹⁶ Ndi mumanyè muntu udi musòmbe kaaba aka ewu. Ndi mutwishibwe ne m'Mwanèètù James, ne ndi ngèèla meeji ne awu m'Mwanèètù wa bakàji James. Mwanèètù Ben, ndi mumanyè. Ànu mpàlà yènù, mínga misangu; mwanèètù udi wenda ukwàta fòto wàwa. Kàdi. . .

Muntu kampànda munda emu, mwaba kanà wònsò, ànu. . . ndi—ndi—ndi ngèèla kadyòmbò ku eci, mushiindàmeene pa eci, ne dyoya dyà Dìyiisha edi.

¹¹⁷ Nudi bamanyè ne Nzambì wàkalaya bwà cyôci eci kwenzekaci mu matùkù à ndekeelu aa anyi? Wàkafila mulayi. Nwamònu anyi? Mpindyewu ncyèna mwà kwenza ne cyènzekè to. Nwamònu's, ncyèna—ncyèna mwà kwenza nàнку to. Yèyè ke Udi ne cyà kucyènza. Yèyè ke Udi Ucyènza; kî mmèmè to. Kàdi mèmè ndi mMwitabuuja, cyanààna ncìvwa mwà kwikala mwimàmè mwab'ewu nnwàmbila cintu kampànda cimvwa ncìyi ngiitabuuja nànsha. Mpindyewu, sambilà, ne wambe ne: “Mukalenge Yesù, ndi mulongèshibwe mu Bible ne Wèwè udi Mwakwidi Munène mpindyewu mene, udi mwà kulengiibwa kudi dyumvwa dyà mateketa ètù.” Nànsha wèwè usanganyibwa penyì. Kàdi ambà ànu ne: “Ndi nKwitabuuja. Nènku, ku diitabuuja, ngiitabuuja cidi muntu awu mwàmbè leelù ewu.”

¹¹⁸ Ki cìvwa Mwanjèlò mungambile ne: “Fikishà bantu ku dikwitabuuja.” Nènku pangikala ngàmba Dìyi dyà Nzambì, kî “nkungiitabuuja mèmè to,” bwalu mbwà “kwitabuuja Dìyi.”

Cyôci kaciyi ne Dìyi to, dìbà adi kanùcitàbùùji to. Kàdi wèwè mwitabùùje ne n'Dìyi, dìbà adi, cyònsò cìdici aci, udi usambila ne witabuuja, ne kumòna Yèyè ní ùcidi mwà kubuulula cidi munda mwà mwoyi wèbè amu.

¹¹⁹ Ne muntu kanà yònsò ewu mmumanyè ne Bible mmwambè, ne: “Dìyi dyà Nzambì nditwè kutàmba mwelè wa mvità wa nseke yibidi, ne djingulula meeji ne mapangadika à mu mwoyi.”

Mùshindù awu ke wàkamanya Abraham ne awu ùvwa Nzambì, pàvwaYe mwà kwamba cìvwa Sarah munkaci mwà kwamba kumfundu mu ntentà, cìvwaye wèla meeji pa bwalu abu; pàakambàYe ne: “Nènkumwènèkèlè,” ki Sarah kudyàmbidilayè munda mwà mwoyi wèndè ne: “Kabyèna mwà kwenzeka nàнку to.”

¹²⁰ Mpindyewu, mèmè ngambì ne Yèyè ùdi kaaba aka bwà kukwondopa. Udi wèla meeji bìshi pa bwalu abu? Bu wèwè ànu mwà kwitabuuja cyanààna! Mpindyewu, mèmè ncyèna mwà kucyènza to, ncyèna ne mùshindù kampànda to; Taatù wa mu Dyulu mmumanyè aci. Nwamònu anyi? Bùndi naabù bùdi ànu bwà kucimòna. Nènku cìndi mmòna aci, ndi ngàmba; ne cìndi—nciyi mmòna to, mu bushùwà bwà bwalu, ncyèna mwà kwamba

to. Kàdi Yèyè ùdi ùshààla ànu Nzambi! Aci ncifwànyìne kuvudija diitabuuja dyèbè, bu Yèyè mwà kucyènza anyi?

Nyiisha mùshindù awu, ncyènzè ànu bu cìdi cìmpàtula mu mèmè ndambù. Kàdi Yèyè ùdi mwab'ewu. Ndi mumanyè cyòci aci.

121 Mvwa kacyà ngashààla mutàngìle muntu pàvwàye mwinyike mutù wèndè panshi, ànu lwà paanyimà *apa*. Mukàjèndè musòmbè ku luseke lwèndè, munkaci mwà kusambila, pèndè. Ànu *mwab'ewu*. Udi ne cintu kampànda pa mwoyi wèbè. Mukàjèèbè, munkaci mwà kusambila. Udi ne bujitu pa mwoyi wèbè. Mbwa màmwènèèbè. Ncyà bushùwà. Udi witabuuja ne Nzambi ùdi mwà kungambila cìdi kaciyi cyènda bìmpè ne màmwènèèbè anyi? Ncyèna mukumanyè to. Tudi beenyi muntu kùdi mukwèndè. Nàнку aci ncyà bushùwà anyi? Udi witabuuja ne Nzambi ùdi mwà kungambila cìdi cimutàcisha anyi? Yèyè kèna kaaba aka to. Ndi mmòna ntàntà mule; ùdi ku esètè kuumukila apa. Ùdi mu Ohio. Ncyà bushùwà. Ùdi ùsaama disaamà dyà mashi. Tùma mukàjèèbè àngàtè mushwàlà wàwa, ùdiye ùdidilapu awu, àkamutentèkèlewu. Kwèdikù mpatà to; neùmvwè bìmpè. Udi witàbùùjà aci anyi?

122 Nkwèkù kùdi inàbànzà mutekète musòmbè mwab'ewu kumpàla kwànyì eku. Ùdi munkaci mwà kudila mwadi. Kùdi cintu cipampàlámùke kùdi mwànà awu, ncyèna mumanyè. . . To, kì ncintu nànsha cìmwè cipampàlámùke to. Yèyè ùdi ànu ne dijinga kampànda. Ùdi ùjinga kupeta dibàtiiza dyà Nyumà Mwimpè. Aci ng'EMU MMUDÌ MUKALENGE WÀMBA. Itàbùùjà, mwànà, newùMupetè. Ncyà bushùwà. Kwèdi mpatà to.

123 Inàbànzà nyèyè ewu musòmbè lwà ku ndekeelu kwà mulongo eku. Ùdi munkaci mwà kusambila. Mèmè ndi mwenyi kùdiye, kàdi yèyè mmubwikila kùdi mundidimbì. Uvwa mupandiibwe misangu yàbùngì. Ndi ncinka ne, tudi beenyi muntu kùdi mukwèndè. Ncyèna mukumanyè to. Kwèna mummanyè to, ànu pàmwàpa ku ditèèleja bàmba bwànyì. Kwèna wa muneemu to. Wèwè udi mwenyi munkaci mwètù. Udi mufùmìne ku Wisconsin. Cimenga cidi Milwaukee. Ne lutàtù lwèbè ndwà kànsèrè; kàdi ku dibèèla. Dipandiibwa ditentàmàngàne, ne nànsha nàнку kabyèna ànu bìlubuluka to. Diitabuuja adi, dyàkalengà mibàngubangu yà civwàlu Cyèndè adi, diitabuuje mpindyewu mene. Cìtùkije mu mwoyi wèbè; nebyènzekè. Ikàlà ne diitabuuja!

124 Muntu mulùme kampànda musòmbè lwà mu ditumba emu. Ùdi ùsambidila mamwèndè. Yèyè mmwenyi kùndi. Ncyèna mumumanyè to. Kàdi yèyè ùdi munkaci mwà kusambidila mamwèndè. Ne mamwèndè ùdi ne cintu cìmwècìmwè cìdi naaci mukàjì ewu aci, kànsèrè. Anyi, ùdi ne bwowà bwàkù, ki cidici. Kùdi muntu mulùme ùdi munkaci mwà kusambidila, ne mwìnè

dyàkàmwè, ní bàdikù mwà kubwela munda emu buumukila ní mpenyi pònsò pàdibo bàsanganyibwa. Lwâyi mwab'ewu bwà dikwàcisha dikesè.

Ndi muswè bwà ewu yònsò wikalabò mwà kusambidila, èlà cyanza cyèbè muulu, amba eci paanyimà pàanyi ne:

Mukalenge, ndi ngiitabuuja, nkwàcishèku Wèwè ku bupidyà bwànyi. Ndi ngiitabuuja, ne mu Bwikadi Bwèbè, pândi ngènda ndonda Dîyi Dyèbè apa, ne byànyi...byanza mbintenteka pambidi dilòlò edi, Nèngiitabè dyondopa dyànyi, mu Dîna dyà Yesù. Amen.

¹²⁹ Nzambi àkubènèshè. Mpindyewu tàngilàayi ne: “Disambila dyà diitabuuja nedisungilè mubèèdi. Bòbò batentèkèle babèèdi byanza, babèèdi nebàsangalè.” Yèyè wàkambila Noà ne mvùla neàlokè. Kacyà kacitu...Kacya Yèyè kàtu, mpindyewu, Yèyè kàvwakù mwàmbe ne: “Panùdi ànu—padibo ànu bàkusambidila, udi umvwa bìmpè to.” Yèyè wàkamba ne: “Nebàsangalè.”

¹³⁰ Wàkambila Noà ne mvùla ùvwa ne cyà kulòka. Mvùla kàvwa mulòke munda mwà bidimu lukàmà ne makumi àbidi to, kàdi's wàkalòka.

Wàkambila Abraham ne ùvwa ne cyà kupetela mwànà kùdi Sarah. Kacyàkenzeka to munda mwà bidimu makumi àbidi ne bitaanu, kàdi wàkamupeta.

Wàkambila Yeshàayi ne virgò neimitè difù. Kacyàkenzeka to munda mwà bidimu nkàmà mwandamukùlù, kàdi virgò awu wàkiimita.

Ncyà bushùwà anyi? Yèyè wàkacilaya! Nànsha cyòci mwà kunènga ntàntà bule kaayi, Udi ùcyèna, mu mîshindù yònsò. Wèwè ciitabùuje.

¹³¹ Lwàkù kumpàlà eku mpindyewu. Mwanèètù Capps àlombolè misambu. Nenwèndeshe twartà anyi? Mpindyewu muntu yònsò ikalè mu disambila mpindyewu.

¹³² Taatù wètù wa mu Dyulu, netùtùmikile mèyi Èbè matùma ku ditentekela babèèdi aba byanza. Ncyèna mumanyè cintu cikwàbò nànsha cìmwè Cyùdi mufwànyine kwenza to, Mukalenge, bwalu Wèwè udi mwàmbe, mu Dîyi Dyèbè ne, Udi mubàpetèle dyondopa dyàbò ku mushinga. Udi mujaadike ne Wèwè udi neètù kaaba aka dilòlò edi, Dîyi didi mwà kujingulula meeji adi mu mwoyi. Udi mujaadike cyòci aci, ne Udi munkaci mwètù. Nènku ndi nkulòmba, Wèwè, Taatù, bwà ne Dîyi Dyèbè, didi kadiyi mwà kupangila adi, divwijiibwè dilelèlà kùdi mwoyi wònsò! Diwàkambà ne: “Nwènù mwà kudìitabuuja; kanwèdi mpatà to, kàdi diitabùujaayi; nwàmibile mukùnà ewu dîyi ne: “Tentèmùkà,” ne kanùyì nwela mpatà to, kàdi nwiitabuuja ne necyènzekè!” Yèyè kàakamba ne ndibà kaayi to.

¹³³ Wèwè wàkambila bantu, ku Mpenta, bwà kubàndabò kuntwaku ne kwindila. Wèwè kacya kwàkamba ne mmèbà, anyi matùkù nànsha; Wàkamba ne: “too ne.” Mpindyewu mbàbà balwe kwitabuuja dyondopa dyàbò. Kabèèdikù meeji ku bùngà bwalu to pa kuumusha ànu ne mbondòpiibwe, too ne mwàlwà dipikudiibwa. Tudi tuKutùmikila ku dibàtentekela byanza, pambidi pààbò, bu beena kwitabuuja. Mu Dìna dyà Yesù Kilistò. Amen.

¹³⁴ Èyo, lwâyì mpindyewu mene. [Katùpà kàà mukàbà wa mēyì munda mutupù—Muf.] . . . wèwè udi mwondòpiibwe. Nzambi àkubènèshè. Nda wèwè ànu kumpàla. Abi’s mbimpè . . . ? . . . [Katùpà kàà mukàbà wa mēyì munda mutupù.]

Bintu byònsò bìdi mwà kwenzeka, itàbùùjà
nàka;
Itàbùùjà nàka, itàbùùjà nàka,
Byònsò . . .

Mukalenge Yesù, ndi nsambidila mishwàlà eyi mpindyewu, mu Dìna dyà Yesù Kilistò. Amen.

Ndi ndikonka ní tudi mwà kushintulula mēyì aa:

Mpindyewu ndi ngìtabuuja, mpindyewu
ngúndì ngìtabuuja,
Bintu byònsò bìdi mwà kwenzeka, mpindyewu
ndi ngìtabuuja;
Mpindyewu ndi ngìtabuuja, mpindyewu ndi
ngìtabuuja,
Bintu byònsò bìdi mwà kwenzeka, mpindyewu
ndi ngìtabuuja.

¹³⁵ Nudi nwitabuuja ne bìvwà bilòmbiibwe ne bijingìibwè nebìfidiiibwe anyi? Nebyènzekè.

¹³⁶ Mvwa mumòne, pàmvwà mpìcila mu mulongo mu katanci kakesè emu, bàmwè bàà ku balundà bànyì bàà cyena Italie bàdi bàfùmìne ku Chicago. Mbanganyì bàdi bamanyè mwanèètù wa bakàjì Bottazzi wa ku Chicago? Èè, nudi bamanyè’s, ùvwa ne lu—lungènyi, lungènyi lunyungùlùke ànu àbìdì aa, bibì, bibì menemene. Kàdi mu dindà adi mu Chicago ku didyà dyà Beena Kantu-ku-byanza beena Kilistò, mèmè kwambila mwanèètù wa bakàjì, ku disonsodiibwa dyà Nyumà Mwimpè. Kwàlukidilayè ku lusekè lùmwè, nènku kàvwa mwà kudìkwata mu yèyè mwinè to. Ki mèmè kwamba ne: “Mwanèètù wa bakàjì, kwàkulòpoka mu bwalu ebu mpindyewu mene to, kàdi neùmvwè bimpè.” Mèmè kwamba ne: “Nebìikalè anyì ngondo dikumi ne mwandamukùlù, anyì bidimu bìbìdì, ànu munkacìnkacì amu neùsàngalè.”

¹³⁷ Dikwàbò ditùkù pàmvwà munkacì mwà kwakula nendè . . . mèmè e kuumvwà ùfila bujaadiki, ne disànkà dyàbùngì be, ne disànkà dyàbùngì menemene ditàmbe dyà matùkù èndè ònsò à mwoyi. Ùvwa wèndesha kàshinyì. Kàvwa ne ditalala to, Bwikadi

bwà Nzambi bùvwa bùmweka bu bumuumùke; mu bushùwà bwà bwalu, civwa mijilu yà mutù mitàndàbàle, nudi bamanyè's; kàdi katanci aka anyi e kwalukilabi ne disànka dítuuta nkòkà, ne bukolè bwà Nyumà Mwímpè bùvwa pambidi pèndè. Kudilayè mwadi, kwela mbilà, yéyè—yéyè ùvwa ne. . . Bávwa ànu munkaci mwà kucyònkómoka, kùkaadi mbingu mitwè ku yisàtù ànyì yinaayi, anyi ngondo mujimà. Ki mèmè kumumvwa ùfila bujaadiki bwènde, mu dyàlumingu dyà kumpàla kwà dyàshàadi edì, ki yéyè kwamba ne: “Mwanèètù Branham, pangàakaalukilà, mèmè kufùnda ne kwangata mukàbà wa méyì awu. Nènku civwa menemene ngondo dikumi ne mwandamukùlù, bulubulu.” Amen.

Nudi baMunangè anyi? Ki mMulenga anyi?

138 Mpindyewu, Nyumà Mwímpè umweumwe udi mwà kudyanjila kwamba ànu mu byòbì menemene awu, kàyì ùpangila musangu nànsha wùmwe, bidimu byònsò ebi; nènku, kupicila ku Dìyì Dyèndè, mmuteetè kunùbulwila leelù ewu ne Nzambi ki ncintu kampànda cyà kule anyi cintu kampànda cyà maalù-malonda to. Yéyè udi ne mwoyi, dībà dyà mpindyewu, Dìyì Dyèndè dimwènèshìbwe. MuDisokoke mu cibwikilu cyà buntu, mu Èkéleziyà Wendè, munkaci mwà kuDìbuulwila ku ditabuujà dyènè ne dyànyì ditabuujà, bònsò pàmwe, tudisanga pàmwe, twenza bùmwe bwà Nzambi. Ncyènà mwà kwenza cintu nwènù kanùyikù to; nwènù kanwèna mwà kwenza cintu mèmè ncìyikù to; nànsha kanwèna mwà kwenza cintu Nzambi kàyikù to. Pa nànkù, bònsò pàmwe cidi cyènza bùmwe, dilamakana. Nzambi mmuntùme bwà kiipàcìlà; nudi nucitabuujà; ki cyòci kwenzeka. Ki cyòci aci, nwamònu's, cishindikiibwe pyòpyòpyò.

Ncyènà mumanye lutàtù lùdi kùdi nànsha, cyònsò cidi muntu kanà yònsò ewu mwambe; byòbì ne, mu mwoyi wèbè amu, udi witabuujà ne neùmfwè bímpè, kakwèna cintu nànsha cìmwè cidi mwà kucìimanyika to. Yéyè ngudi mwambè nànkù. Ki kwambaYè ne: “Maulu ne buloba nebijiminè, kàdi Dìyì Dyànyì kadyàkupangilakù to.” Udi witabuujà aci anyi?

139 Mbanganyi bìikalà mwà kunsambidila mu masangisha makwàbò pànyaaya apa? Mèmè ndi muntu udi ukèngela disambila. Nwamònu anyi? Bantu bònsò mbandyombòle, nwamònu's, pa kuumusha nwènù, kàdi nànsha nànkù kùdi Dimiinu pambèlu pàapa.

140 Mvwa mutùme mukàndà ku Àfrikè du Sud. Kabàvwa baswè kumbwejamù to ànu mèmè mutwè byàlà pa mikàndà bwà ne mvwa “mwà kubàtiiza, ku luseke alu, muntu yònsò misangu yisàtù; musangu ùmwè bwà Taatù, ne musangu ùmwè bwà Mwànà, ne Nyumà Mwímpè, mpàla mwinyika panshì. Ku luseke lukwàbò, mvwa ne cyà kubàtiiza mpàla mwela muulu, musangu ùmwè bwà Taatù. . . Ne kulongesha ne aci civwa Dilongesha dyà nshindàmeenu.”

Mémè kubàfundila mukàndà. Mémè kwamba ne: “Nyumà Mwímpè ùvwa munkaci mwà kuteeta, bwà bidimu bikesè byà ndekeelu, bwà kumbweja mu Àfrikè kàbidì. Mmuswè kukwata mudimu ne mudimu wànyì wà bwambi kuntwaku kùvwà bantu binunu makumi àsàtù biitàbùuje Kilistò mu mapingaja kampànda.” Mémè kwamba ne: “Vùlukàayi ne, mashi à yôyi misùukà ayi àdi pambidi pèènu, kî mpambidi pàanyi mémè to. Ndi mwanysishe bwà kulwa, kàdi nwènù kanwèna baswè kucyèna to.”

Ndi ndikonka ne ncinyi cikalaku mu ditùkù edi pàdi Yesù, Mwànà wa Nzambi mwipàciibwe mu èkèleeziyà, Dìyi dibèngiibwe? Kàdi mu—mu byònsò abi, Yèyè úcidi ànu ùDìmanyisha kùdì cisàmbà Cyèndè. Kanwènaayikù ne kusàkidila bwà bwalu abu anyi?

¹⁴¹ Nèku ngapìci, dilòlò edi, mbàtentelela byanza, bàmwè biikala bakàji bakùlakàji, bàmwè bansongà, bàmwè bakùlakàji, bàmwè bansongàalùmè, bàmwè balùme bakùlakàji, biinè abu babole bolabola ne bisùlùlù bu mémè kùnu. Mémè kudyàmbidila ne: “Basòmbe mwaba awu, basòmbe mwaba awu bàtèeleja Dìyi didi bàà pa buloba bònsò bèèla meeji ne ndipaala edi.” Nwamònu anyi? Bàdi—bàdi mulonda. Nwamònu’s, Nzambi ùdi mwab’ewu bwà kuwùpunga, kukupàtula buludì mu disaamà dyèbè adi. Mmulayi wà Dìyi. Vùlukàayi ànu ne, necibangè kushilakana ne: “Nèmbàkòkè; paNgàbàndishiibwa, Nèmbàkòkè.” Neàdipàtùle munda mwèbè amu. Neàdipàtùle cyà bushùwà. Wèwè Mwitàbùujà ànu cyanàànà, ikàlà ne diitabuuja mu Yèyè. KùMwedì mpatà to. Mwitàbuujè Yèyè.

¹⁴² Nsambidilaayi. Nwènù kanùyì ne muntu mukwàbò wa kusambidila to, nwamvùlukaayikù ànu mémè. Nèku pashiishe:

Too ne patwàsangilà! too ne patwàsangilà!

Too ne patwàsangilà. . .

Twasàkidilaayi bwà kufùmina ntàntà mile ayi. Nzambi ànùlame panùdi nwalukila kumbèlu apa!

Too ne patwàsangilà. . .

Elàayi beena Kilistò bònsò, nùbàsekèlèlè, myoyi yà kùdì kasumbu aka. Ditalala dyà Nzambi diikalè pambidi pèènu! Shalom!

Nzambi ikalè neenù too ne patwàsangilà
cyàkàbìdì!

[Mwanèètù Branham ùdi wimbila mu matàma *Nzambi Ìkalè Neebè—Muf.*]

. . . too ne patwàsangilà!

. . . ku makàsà à Yesù;

Too ne patwàsangilà! too ne patwàsangilà!

Nzambi ikalè neenù too ne patwàsangilà
cyàkàbìdì!

143 Ndi ne disànkà dyàbúngì. Nudi numòna's, kùdi bimwè, kùdi bintu byàbúngì bìndì nciyi mumanyè to, kàdi kùdi bintu kampànda bìndì mumanyè bulelèlè. Ndi ne kusàkidila kwàbúngì bwènù nwènù. Ndi ne disànkà dyàbúngì dyà kwikala muswikàkane neenù. Ndi ne disànkà dyàbúngì dyà kwikala umwe wa kunùdi. Nzambì ikalè neenù. Neikalè neenù. Kàadyàkunùshìya nànsha. Kàadyàkunùlekela nànsha. Kàakunùshìya to. Nukàadi bamana kupanda ne bapàtùke mu cilàmbà cikùdika mpindyewu. Nwamònu anyi?

144 Ndi ne disànkà dyàbúngì dilòlò edi bwà kumòna Mwanèètù Palmer, umwe wa ku bampaasàtà bèètù bakwàcishanganyi neetù kaaba aka, wa ku Géorgie. Mwanèètù Junior Jackson ùdi mu nzùbu emu mwaba kampànda, paanyimà mu ditumba mwàmwa, tudi ne disànkà dyà kwikala nendè. Mwanèètù Don Ruddell udi musòmba mwab'ewu. Kaa, bàdi bààbúngì be! Ncyènà mumanyè to, ní ndi mupwè ní nganyi mwoyi. . . Mwanèètù Ben Bryant ewu, ne bààbúngì bakwàbò aba, mwanèètù wa maalu malenga, Willard Collins. Tudi ne disànkà dyàbúngì dyà kwikala neenù bònsò kaaba aka.

Ndi ndikonka ní tudikù bafwànyine kujuukila kuulu, bwà katanci kakesè cyanààna mpindyewu. Twinyikàayi mitù yètù mpindyewu.

Too ne patwàsangilà!

Too ne patwàsangilà ku makàsà à Yesù; (Too ne patwàsangilà!)

. . . too ne patwàsangilà!

Nzambì ikalè neenù too ne patwàsangilà
cyàkàbìdì!

145 S'nudi búmwè ditàmba kulamakana dyà bwobùmwè ne Nyumà adi's?

Tùwimbilaayi mu matàma.

Mvwa mutwìshìle Mwanèètù McKinney mèsù, wa ku Ohio, ùdi neetù. Mwanèètù John Martin ne mwanààbò wa balùme. Tudi ne disànkà dyà kwikala neenù bònsò. Ndi mufwànyine kwikala nciyi munùmòne to, bàna bèètù. Yèyè mmunùmanyè.


Too ne patwàsangilà!

Swàyi bwà mwoyi wanyì ne wènù nwènù, ne mwoyi wà Nzambì, wikalè ùmwè too ne patwàsangilà!

(Ndi muswè kulòmba muntu bwà kutangalajayè. . . ? . . .)

146 Patùdì twinyika mitù yètù mpindyewu mu disambila apa, tuteeta kumanyisha mwambi yònsò ne tudi ne disànkà bwà diikalakù dyàbo mwab'ewu, beena kwitabuujà bònsò, nwènù bàà ku Tennessee, ku Ohio, ne mu ditùnga dijimà. Bakàjì kampànda bàndì mutuutàkeena naabò leelù ewu, buumùkila ku Boston kwàka. Bàna bèètù bàà bafiike bàvwà mwab'ewu, mu dindà emu, ne bàà kuntu kwàka kàbìdì. Bààbúngì bàà ku bitùpà

bishìilàngàne byà ditùnga; ndi nkusàkidila, mulundà wanyì munanga wa lulamatu. Nzambi ìkalè neebè. Ndi nkubiikila wêwè ne mulundà wanyì. Nudi bavùluke cyàkamba Yesù pa bwalu abu anyì? “Mutàmbe kuseemena pabwìpì menemene kupita too ne mwanèètù,” èyowà’s, mulundà kampànda.

¹⁴⁷ Patùdì twinyika mitù yètù mpindyewu apa (Too ne patwàsangilà cyàkàbidì mu matùkù makesè àdì àlondà aa, Nzambi ìkalè neenù.), Nêndombè mwanèètù mwîmpè, wa lulamatu, Mwanèètù Richard Blair, ní ùdikù mwà kutùtangalaja ne mwâkù wà disambila, Mwanèètù Blair. 

64-0614E Cimonyamonya
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org